





1959





樂府詩集
五



Centimetres
© The Tiffen Company, 2007

Blue Cyan Green Yellow Red Magenta White 3/Color Black





樂府詩集卷第十四

太原 郭茂倩 編次

燕射歌辭

宋四廂樂歌

王韶之

宋書樂志曰王韶之造四廂樂歌五篇一曰肆夏樂歌四章客入四廂振作於鑠曲皇帝當陽四廂振作將將曲皇帝入變服四廂振作於鑠將將二曲又黃鍾太簇二廂作法章九功二曲二曰大會行禮歌二章沾洗廂作三曰王公上壽歌一章黃鍾廂作四曰殿前登歌三章別用金石五曰

食舉歌十章黃鍾太簇二廂夏作黃鍾作
晨義體至和王道開元辰禮有容五曲太
簇作五玉懷荒裔皇猷緝惟永初王道純
五曲古今樂錄曰按周禮云王出入奏王
夏賓出入奏肆夏肆夏本施之於賓帝王
出入則不應奏肆夏也

肆夏樂歌

於鑠我皇體仁包元齊明日月比量乾坤陶甄百王稽
則黃軒訐謨定命辰告四蕃
將將蕃后翼翼羣僚盛服待晨明發來朝饗以八珍樂
以九韶仰祇天顏厥猷孔昭

法章既設初筵長舒濟濟列辟端委皇除飲和無盈威
儀有餘溫恭在位敬終如初
九功既歌六代惟時被德在樂宣道以詩穆矣大和品
物咸熙慶積自遠告成在茲

大會行禮歌

大哉皇宋長發其祥纂系在漢統源伊唐德之克嗣休
有烈光配天作極辰居四方
皇矣我后聖德通靈有命自天誕受休禎龍飛紫極造
我宋京光宅宇宙赫赫明明

王公上壽歌

獻壽爵慶聖皇靈祚窮二儀休明等三光

樂府十四卷二
殿前登歌

明明大宋緝熙皇道則天垂化光定天保天保既定肆
覲萬方禮繁樂富穆穆皇皇

沔彼流水朝宗天池洋洋貢職抑抑威儀既習威儀亦
閑禮容一人有則作乎萬邦

烝哉我皇固天誕聖履端惟始對越休慶如天斯久如
日斯盛介茲景福永固駿命

食舉歌

晨義載曜萬物咸覩嘉慶三朝禮樂備舉元正肇始典
章暉明明萬方畢來賀華裔充皇庭多士盈九位俯仰觀
玉聲恂恂俯仰載爛其輝鼓鍾震天區禮容塞皇闈息

樂窮休慶福履同所歸

五玉既獻三帛是薦爾公爾侯鳴玉華殿皇皇聖后降
禮南面元首納嘉禮萬邦同歡願休哉君臣嘉燕建五
旗列四縣樂有文禮無倦融皇風窮一變

體至和感陰陽德無不柔繁休祥瑞璧應嘉鍾舞靈
鳳躍潛龍景星見甘露墜木連理禾同穗玄化洽仁澤
敷極禎瑞窮靈符

懷荒裔綏齊民荷天祐靡不賓靡不賓長世弘盛昭明
有融繁嘉慶繁嘉慶熙帝載合氣咸和蒼生欣戴三靈
協瑞惟新皇代

王道四達流仁布德窮理詠乾元垂訓順帝則靈化侔

四時幽誠通玄默德澤被八紘乾寧軌萬國

皇猷緝成熙泰禮儀煥帝庭要荒服遐外被髮襲纓冕

左袵回衿帶天覆地載流澤汪濊聲教布護德光大

開元辰畢來王奉貢職朝后皇鳴珩佩觀典章樂王度

悅徽芳陶盛化遊太康丕昭明永克昌

惟永初德丕顯齊七政敷五典彝倫序洪化闡王澤流

太平始樹聲教明皇紀和靈祇恭明祀衍景祚膺嘉祉

禮有容樂有儀金石陳干羽施邁武護均成池歌南風

舞德稱文武煥頌聲興

王道純德彌淑寧八表康九服道禮讓移風俗移風俗

永克融歌盛美造成功詠徽一作烈邈無窮

齊四廂樂歌 宋韻

南齊書樂志曰元會大饗四廂樂齊徵改

革多仍宋舊辭其臨軒樂亦奏肆夏於鑠

四章云

肆夏樂歌

於鑠我皇體仁包元齊明日月比量乾坤陶甄百王稽

則黃軒訂謨定命辰告四蕃

將將蕃后翼翼羣僚盛服待晨明發來朝饗以八珍樂

以九韶仰祇天顏厥猷孔昭

法章既設初筵長舒濟濟列辟端委皇除飲和無盈威

儀有餘溫恭在位敬終如初

樂府十四卷四
九功既歌六代惟時被德在樂宣道以時穆矣大和品
物咸熙慶積自遠告成在茲

大會行禮歌

大哉皇齊長發其祥祚隆姬夏道邁虞唐德之克嗣休
有烈光配天作極辰居四方

皇矣我后聖德通靈有命自天誕授休禎龍飛紫極造
我齊京光宅宇宙赫赫明明

王公上壽歌

獻壽爵慶聖皇靈祚窮二儀休明等三光

殿前登歌

明明齊國緝熙皇道則天垂化光定天保天保既定肆

覲萬方禮繁樂富穆穆皇皇

沔彼流水朝宗天池洋洋貢職抑抑威儀既習威儀亦
閑禮容一人有則作孚萬邦

烝哉我皇寔靈誕聖履端惟始對越休慶如天斯崇如
日斯盛介茲景福永固洪命

食舉歌

晨羲載煥萬物咸覩嘉慶三朝禮樂備舉元正肇始典
章徽明萬方來賀羣夷充庭多士盈九德俯仰觀玉聲
恂恂俯仰載爛其暉鍾鼓震天區禮容塞皇闈息樂窮
休慶福履同所歸

五玉既獻三帛是薦爾公爾侯鳴玉華殿皇皇聖后降

樂府十四卷五
禮南面元音納嘉禮萬邦同欽願休哉休哉君臣熙宴
建五旗列四縣樂有文禮無劻融皇風窮一變

禮至和感陰陽德無不柔繫休祥瑞徵辟應嘉鍾儼崇
鳳躍潛龍景星見甘露墜木連理禾同穗玄化洽仁澤
敷極禎瑞窮靈符

懷荒遠綏齊民荷天祐靡不寶靡不寶長世盛昭明有
融繁嘉慶繁嘉慶熙帝載含氣感和蒼生欣戴三靈協
瑞惟新皇代

王道四達流仁德窮理詠乾元垂訓從帝則靈化侔四
時幽誠通玄默德澤被八紘禮章軌萬國

皇猷緝咸熙泰禮儀煥帝庭嬰荒服遐外被髮襲纓冕

左袵回衿帶天覆地載澤流汪濊聲教布護德光大

開元辰畢來王奉貢職朝后皇鳴珩佩觀典章樂王慶
悅徽芳陶盛化遊太康惟昌明永克昌

惟建元德丕顯齊七政敷五典彝倫序洪化闡王澤流
太平始樹靈祇恭明祀仁景祚膺嘉祉

禮有容樂有儀金石陳于羽施邁武濩均咸池歌南風
德永稱文明煥頌聲興

王道純德彌淑寧八表康九服尊禮讓移風俗移風俗
永克融歌盛美告成功詠休烈邈無窮

梁三朝雅樂歌

俊雅三首

沈約

隋書樂志曰眾官出入奏俊雅取禮記王制云司徒選士之秀者升之學曰俊士也二郊太廟明堂三朝同用焉

設官分職髦俊攸髦俊伊何貴德尚齒唐又咸事周寧多士區區衛國猶賴君子漢之得人帝猷乃理開我八襲闢我九重珩珮流響纓紱有容衮衣前邁列辟雲從義兼東序事美西雍分階等肅異列齊恭重列北上分庭異陞百司揚職九賓相禮齊宋舅甥曾衛兄弟思皇藹藹羣龍濟濟我有嘉賓實惟愷悌

同前三首

蕭子雲

惟王建國辨方正位於赫有梁向明而治知人則哲聰

明文思思皇多士俊又咸事弗惟其官惟人乃備訓迪庶工位以德序恭己而治垂旒當宁或以言揚或以事舉春秋觀圭幣惟旅翼翼鄴郇峩峩齊楚客入金奏賓至縣興威儀有則是降是升百辟卿士元普是承左右秩秩終敬且矜彝倫攸序王猷以凝

胤雅

沈約

隋書樂志曰皇太子出入奏胤雅取詩君子萬年永錫祚胤也三朝用之

自晉殷代哲王迭有降及周成惟器是守上天乃眷大梁既受灼灼重明仰承元首體乾作貳命服斯九置保置師居前居後前星比耀克隆萬壽

同前

蕭子雲

天下爲家大梁受命睿求一德惟烈無競儀刑哲王元良誕慶灼灼明兩作離承聖英華外發溫文成性立師立保左右惟政休有烈光前星比盛

寅雅

沈約

隋書樂志曰王公出入奏寅雅取尚書周官云貳公弘化寅亮天地也三朝用之禮莫違樂具舉延藩辟朝帝所執栢蒲列齊莒坐裘毳紛容與升有儀降有序齊簪紱忘笑語始矜嚴終酣醕

同前

蕭子雲

車同軌行同倫來萬國相九賓延羣后朝蓋臣禮時行

樂日新擬夷則奏雅寅衮衣曜玉帛陳儀抑抑皇恂恂

介雅三晉

沈約

隋書樂志曰上壽酒奏介雅取詩大雅云君子萬年介爾景福也三朝用之

百福四象初萬壽三元始拜獻惟衮職同心協卿士北極永無窳南山何足擬

壽隨百禮洽慶與三朝升惟皇集繁祉景福互相仍申錫永無遺穰簡必來應

百味既含馨六飲莫能尚玉疊信湛湛金卮頗搖漾敬舉發天和祥祉流嘉貺

同前三晉

蕭子雲

明君創洪業大同登頌聲開元洽百禮來儀奏九成申
錫南山祚赫赫復明明

三朝禮樂和百福隨春酒玉樽湛而獻聰明作元后安
樂享延年無疆臣拜手

四氣新元旦萬壽初今朝趨拜齊袞玉鍾石變簫韶日
升等皇運洪基邈且遙

需雅八音

沈約

隋書樂志曰食舉奏需雅取易象曰雲上
於天需君子以飲食宴樂也三朝用之

實體平心待和味庶羞百品多爲貴或鼎或彝宣九沸
楚桂胡鹽芼芳卉加籩列俎彫且蔚

五味九變兼六和令芳甘旨庶且多三危之露九期禾

圓一作

按方丈粲星羅皇舉斯樂同山河

九州上腴非一族玄芝碧樹壽華木終朝采之不盈掬

用一作

拂腥羶和九穀既甘且飫致遐福

人欲所大味爲先興和盡敬咸在旃碧鱗朱尾獻嘉鮮
紅毛綠翼墜輕翮臣拜稽首萬斯年

擊鍾以俟惟大國況乃御天流至德侑食斯舉揚盛則
其禮不讐儀不忒風猷所被深且塞

膳夫奉職獻芳滋不麇不夭咸以時調甘適苦別澠淄

其德不爽受福釐於焉逸

一作豫永無期

備味斯饗惟至聖咸降人神禮爲盛或風或雅流歌詠

負鼎言歸啓殷命悠悠四海同茲慶
道我六穗羅八珍洪鼎自爨匪勞薪荆包海物必來陳
滑甘滫瀡味和神以斯至德被無垠

同前八音

蕭子雲

農用八政食爲元播時百穀民所天禘嘗郊社盡索虔
譙饗饋食禮節宣九功惟序登頌絃
感物而動物靡遂大羹不和有遺味非極口腹而行氣
節之民心殺攸貴寧爲禮本饗與饋
始諸飲食物之初設卦觀象受以雩蒸民乃粒有牲芻
自衛反魯刪詩書弋不射宿殺已祛
在笞哲王觀民志庶羞百品因時備爲善不同同歸治

蔬膳菲食化始至率物以躬行尊位

雅有泂酌風采蘋蒹藻之菜非八珍澗溪沼沚貴先民
明信之德感人神譬諸禴祭在西隣

行葦之微猶物踐寧惟血氣無身剪聖人之心微而顯
千里之應出言善况遂豚魚革前典

春酸夏苦各有宜筐筥錡釜備糗醢逡巡揖讓詔司儀
卑高制節明等差君臣之序正在斯

日月光華風四塞規饗有序儀不忒匪天私梁乃佑德
光被四表自南北長世綴旒爲下國

雍雅三音

沈約

隋書樂志曰撤饌奏雍雅取禮記仲尼燕

居云大饗客出以雍撤也三朝用之

明明在上其儀有序終事靡訐收銅撤俎乃升乃降和樂備舉天德莫違人謀是與敬行禮達茲焉讌語

我餽惟阜我肴孔庶嘉味既充食旨斯飫屬厭無爽冲和在御擊壤齊歡懷生等豫蒸庶乃粒宴由仁恕

百司警列皇在在陛既飫且醕卒食成禮其容穆穆其儀濟濟凡百庶僚莫不愷悌奄有萬國抑由天啓

同前三首

蕭子雲

穆穆天子時惟聖敬濟濟羣公恭為德柄為撤有典膳夫是命禮行禘嘗義光朝聘神饗其德民洽其慶尚有和羹既戒且平亦有其餽亦惟克明其餽惟旅其

醕惟成百禮斯洽三宥已行明哉元首適駿其聲

戒食有章卒食惟序庭鳴金奏凱收邊筥客出以雍撤以振羽離磬乃作和鍾備舉濟濟威儀嗶嗶奠簾

北齊元會大饗歌

隋書樂志曰北齊元會大饗協律不得升

陛黃門舉麾於殿上賓入門四廂奏肆夏

皇帝出閣奏皇夏皇帝當展羣臣奉賀奏

皇夏皇帝入宁變服黃鍾太簇二廂奏皇

夏皇帝變服移幄坐於西廂帝出升御坐

姑洗廂奏皇夏王公奠璧奏肆夏上壽黃

鍾廂奏上壽曲皇太子入至坐位酒至御

樂府一四卷一
殿上奏登歌食至御前奏食舉樂文舞將
作先設階步次奏文舞武舞將作先設階
步次奏武舞皇帝入鍾鼓奏皇夏

肆夏

昊蒼眷命興王統天業高帝始道邈皇先禮成化穆樂
合風宣寶朝荒夏揚對穹玄

皇夏

夏正肇旦周物充庭具條在位俛伏無聲大君穆穆宸
儀動睟日煦天迴萬靈胥萃

皇夏

天子南面乾覆離明三千咸列萬國填并猶從禹會如

次湯庭奉茲一德上下和平

皇夏

我應天曆四海爲家協同內外混一戎華鶴蓋龍馬風
乘雲車夏章夷服其會如麻九賓有儀八音有節肅肅
於位飲和在列四序氤氳三光昭晰君哉大矣軒唐比
轍

皇夏

皇運應籙廓定區寓受終以文構業以武堯啓命舜舜
亦命禹大人馭歷重規沓矩欽明在上昭納八賁從靈
體極誕聖窳神化生羣品一作陶育烝人展禮肆樂協
此元春

樂府十四卷十一
肆夏

萬方咸暨三揖以申垂旒馮玉五瑞交陳拜稽有章升
降有節聖皇負辰虞唐此烈

上壽曲

仰三光奏萬壽人皇御六氣天地同長久

登歌

大齊統曆道化光明馬圖呈寶龜籙告靈百蠻非衆八
荒非逖同作堯人俱包禹迹

天覆地載成以四時惟皇是則比大於茲羣星拱極衆
川赴海萬寓駿奔一朝咸在

齊之以禮相趨帝庭應規蹈矩玉色金聲動之以樂和

風四布龍申鳳舞鸞歌麟步

食舉樂

三端正啓萬方觀禮具物充庭二儀合體百華照曉千
門洞晨或華或裔奉贄惟新悠悠巨六合圓首莫不臣
仰施如雨晞和猶日風化表笙鏞歌謳被琴瑟誰言文
軌異今朝混爲一

彤庭爛景丹陛流光懷黃綰白鷄鸞成行文贊百揆武
鎮四方折衝鼓雷電獻替協陰陽大矣哉道邁上皇陋
五帝狹三皇窮禮物該樂章序冠帶垂衣裳

天壤和家國穆悠悠萬類咸孕育契冥化侔大造靈効
珍神歸寶興雲氣飛龍蒼麟一角鳳五光朱雀降黃玉

表九尾馴三足擾化之定至矣哉瑞感德四方來
囹圄空水火菽粟求賢振滯棄珠玉衣不靡宮以卑當
陽端嘿壘拱無爲云云萬有其樂不訾

嗟此舉時逢至道肖形成自持賦命無傷天行氣進皇

輿遊龍服帝卑一作聖主寧區宇乾坤永相保

牧野征鳴條戰大齊家萬國拱揖應終禪與主廓清都

大君臨赤縣高居深視當辰正殿旦暮之期今一見

兩儀分牧以君陶有象化無垠大齊德邈誰羣超鳳火

冠龍雲露以潔風以薰榮光至氣氤氳

神化遠人靈協寒暑調風雨變披泥檢受圖謀圖謀啓

期運昌分四序綴三光延寶祚眇無疆

惟皇道升平日河水清海不溢雲干呂風入律驅黔首
入仁壽與天高竝地厚

刑以厝頌聲揚皇情邈眷汾襄岱山高配林壯亭亭聳

云云望旆葳蕤駕駉駉刊金闕奠玉龜

皇夏

禮終三爵樂奏九成允也天子穹壤和平載色載笑反

寢宴息一人有祉百神奉職

樂府詩集卷第十四

東吳毛晉訂正

男辰再訂

樂府詩集卷第十五

燕射歌辭

太原

郭茂倩

編次

周五聲調曲

庾信

曲序曰元正饗會大禮賓至食舉稱觴薦
五六律既從八風斯暢以歌大業以舞成
功

宮調曲五首

氣離清濁剖元開天地分三才初辨正六位始成文繼
天爰立長安民乃樹君其明廣如日其澤厚如雲惟咎
我文祖撥亂拒謳歌三分未撫運八百不陵河禮敷天

下信樂正神人和風塵行息警江海欲無波

我皇承下武革命在君臨膺圖當舜玉嗣德受堯琴沈

首多推運陽城有讓心就日先知遠觀淵早見深玄精

實委御蒼正乃皆平履端朝萬國年祥一作慶百靈玉

帛咸觀禮萃戎各在庭鳳響中夷則天文正玉衡皇基

自天保萬物乃由庚

握衡平地紀觀象正天樞祺祥鍾赤縣靈瑞炳皇都受

受昭萃玉還披蘭葉圖金波來白兔弱木下蒼烏玉斗

調口協金沙富國租青丘還擾圃丹穴更巢梧安樂新

咸慶長生百福符

明明九族序穆穆四門賓陰陵朝北附蟠木引東臣澗

途求板築溪源取釣綸多士歸賢戚維城屬茂親貴位

連南斗高榮據北辰迎時乃推策司職且班神日月之

所照霜露之所均永從文軌一長無外戶人

鬱盤舒棟宇崢嶸侔大壯拱木詔林衡全模徵梓匠千

櫨綺翼浮百拱長虹抗北去邯鄲道南來偃師望龍首

載文槐雲楹承武帳居者非求隘卑宮豈難尚壯麗天

下觀是以從蕭相

變宮調二首

帝遊光出震君明擅在離巖廊惟眷顧欽若尚無為龍

穴非難附鸞巢欲可窺具茨應不遠汾陽寧足隨烝民

播殖重溝洫劬勞多桑林還注雨積石遂開河明徵逢

永命平秩值年和夏有薰風曲方聞晨露歌

移風廣軒曆崇德盛唐年成文興大雅出豫動鈞天黃
鍾六律正闔闔八風宣孤竹調陽管空桑節雅絃舞林
鸞夏下歌山鳳欲前聞音能辨俗聽曲乃思賢感物觀
治亂治心防未然君子得其道太平何有焉

商調曲四首

君以宮唱寬大而謨明臣以商應聞義則可行有熊爲
政訪道於容成殷湯受命委任於阿衡忠其敬事有罪
不逃刑誦其箴諫言之無隱情有剛有斷四方可以寧
既頌既雅天下乃升平專精一致金石爲之開動有一作
兩心妻子恩情乖苟利社稷無有不盡懷昊天降祐

元昔惟康哉

百川俱會大海所以深羣材既聚故能成鄧林猛虎在
山百獸莫敢侵忠臣處國天下無異心管我文祖執心
且危慮驅剪豺狼經營此天步今我受命又無敢逸豫
惟爾弼諧各可知兢懼

禮樂既正入神所以和玉帛有序志欲靜干戈各分符
瑞俱誓裂山河今日相樂對酒且當歌道德以喻聽撞
鐘之聲神姦不若觀鑄鼎之形艷宮既朝諸侯於是穆
岐陽或狩淮夷自此平若涉大川言憑於舟楫如和鼎
實有寄於鹽梅君臣一體可以靜氛埃得人則治何世
無奇才

樂府十五卷三
風力是舉而台階序平重黎既登而天地位成功無與
讓銘太常之旌世不失職受駢毛之盟輯瑞班瑞穆穆
於堯門惟翰惟屏懸於周原功成而治定禮樂斯存
復子而明辟姬旦何言

角調曲二首

止戈見於絕轡之野稱伐聞於丹水之征信義俱存乃
先忘食五材竝用誰能去兵雖聖人之大寶曰位實天
地之大德曰生涇渭同流清濁異能琴瑟竝御雅鄭殊
聲擾擾烝人聲教不一茫茫禹跡車軌未并志在四海
而尚恭儉心包宇宙而無驕盈言而無文行之不遠義
而無立勤則無成惻隱其心訓以慈惠流宥其過哀矜

典刑

匡贊之士或從漁釣雲雨之才乍歎幽谷尋芳者追深
逕之蘭識韻者探窮山之竹克明其德貢以三事樹之
風聲言于九牧協用五紀風若從時農用八政甘作其
穀殊風共軌見之周南異畝同穎聞之康叔祁寒暑雨
是無胥怨天覆雲油滋焉滲漉幸無謝上古之淳人庶
可以封之於比屋

徵調曲六首

乾以含養覆載日月以貞明照臨達人以四海為務
明君以百姓為心水波瀾者源必遠樹扶疎者根必深
雲雨取施無不洽廊廟求才多所任

淳風布政常無欲至道防人能變俗求仁義急於水火
用禮讓多於菽粟屈軼無佞人可指獬豸無繁刑可觸
王道蕩蕩用無爲天下四人誰不足

聖人千年始一生黃河千年始一清攝提以之而從紀
玉燭於是而文明東南可以補地缺西北可以正天傾
浮鼇則東海可厲運鍾則南山可平衆仙就朝於瑤水
羣帝受享於明庭懷和則棘任竝秦功烈則鍾鼎俱銘
三光以記物呈形四時以裁成正位雷風大山岳之響
寒暑通陰陽之氣武功則六合攸同文教則二儀經緯
有道則咸浴其德好生則各繁其類白日經天中則移
明月橫漢滿而虧能虧能缺旣無爲雖盈雖滿則不危

開信義以爲苑囿立道德以爲城池周監二代所損益
郁郁乎文其可知庖犧之親臨佃漁神農之躬秉耕稼
湯則救旱而憂勤禹則正冠而無暇草上之風無不偃
君子之耻知可化將欲比德於五皇未始追蹤於五霸
纖纖不絕林薄成涓涓不止江河生事之毫髮無謂輕
慮遠防微乃不傾雲官乃垂拱大君鳳曆惟欽明元首
類上帝而禋六宗望山川而朝羣后地鏡則山澤俱開
河圖則魚龍合負我之天綱莫不該閭闔九關天門開
卿相則風雲玄感匡贊則星辰下來旣興周室之三聖
乃舉唐朝之八才萃臣參謀於左相大老教政於中台
其宜作則於明哲故無崇信於姦回

正陽和氣萬類繁君王道合天地尊黎人耕植於義圃
君子翱翔於禮園落其實者息其樹飲其流者懷其源
咎繇爲謀不仁遠士會爲政羣盜奔克寬則昆蟲內向
彰信則殊俗宅心浮橋有月支抱馬上苑有烏孫學琴
赤玉則南海輸賚白環則西山獻琛無勞鑿空於大夏
不待蹶角於蹠林

羽調曲五音

樹君所以牧人立法所以靜亂皆惡旣其南巢元凶於
是北竄居休氣而四塞在光華而兩旦是以雨施作解
是以風行惟渙周之文武洪基光宅天下文思千載克
聖咸熙七百在我應期實昊天有成命惟四方其訓之

運平後親之俗時亂先疎之雄踰桂林而驅象濟弱水
而承鴻旣浮干呂之氣還吹入律之風錢則都內貫朽
倉則常平粟紅火中乃寒乃暑年和一風一雨聽鍾磬
念封疆聞笙竽思畜聚瑤琨篠蕩旣從怪石鈇松卽序
長樂善馬成廐水衡黃金爲府

百川乃宗巨海眾星是仰北辰九州攸同禹跡四海合
德堯臣朝陽棲於鳴鳳靈時牧於般麟雲玉葉而五色
月金波而兩輪涼風迎時北狩小暑戒節南巡山無藏
於紫玉地不受於黃銀雖南征而北怨實西略而東賓
旣永清於四海終有慶於一人

定律零陵玉管調鍾始平銅尺龍門之下孤桐泗水之

樂府十五卷六
濱鳴石河靈於是讓珪山精所以奉璧滌九川而賦稅
棗三危而納錫北里之禾六穗江淮之茅三脊可以玉
檢封禪可以金繩探冊終永保於鴻名足揚光於載籍
太上之有立德其次之謂立言樹善滋於務本除惡窮
於塞源冲深其智則厚昭明其道乃尊仁義之財不匱
忠信之禮無繁動天無有不屆惟時無幽不徹作德心
逸日休作偽心勞日拙自非剛克掩義無所離於勦絕

隋元會大饗歌

隋書樂志曰元會皇帝出入殿庭奏皇夏
郊丘社廟同用皇太子出入奏肆夏食舉
奏食舉歌上壽酒奏上壽歌

皇夏

深哉皇度粹矣天儀司陞整理式道先馳八屯霧擁七
萃雲披退揚進揖步矩行規句陳乍轉華蓋徐移羽旗
照耀珪組陸離居高念下處安患危照臨有度紀律無
虧

肆夏

惟熙帝載式固王猷體乾建本是曰孟侯馳道美漢寢
門稱周德心既廣道業惟優傳保斯尊賢才與遊瑜玉
發響畫輪停輶皇基方峻比邕恒休

食舉歌八首

燔黍設教禮之始五味相資火爲紀平心和德在甘旨

牢羞既陳鍾石俟以斯而御揚盛軌
養身必敬禮食昭時和歲阜庶物饒鹽梅既濟鼎鉉調
特以膚膾加臠臠威儀濟濟懋皇朝
饗人進羞樂侑作川潛之膾雲飛臠甘酸有宜芬勺藥
金敦玉豆盛交鐸御鼓既聲安以樂
玉食惟后膳必珍芳菽既絜重秬新是能安體又調神
荆包畢至海貢陳用之有節德無垠
嘉羞入饋猶化謐沃土名滋帝臺實陽華之菜雕陵粟
鼎俎芬芳豆邊溢通幽致遠車書一
道高物備食多方山膚既善水豢良桓蒲在位奠業張
加籩折俎爛成行恩風下濟道化光

禮以安國仁為政具物必陳饗牢盛且采斤斧順時令
懷生熙熙皆得性於茲宴喜流嘉慶
皇道四達禮樂成臨朝日舉表時平甘芳既飫醕以清
揚休玉卮正性情隆我帝載永明明

上壽歌

俗已乂時又良朝玉帛會衣裳基同北辰久壽共南山
長黎元鼓腹樂未央

隋宴羣臣登歌

皇明馭歷仁深海縣載擇良辰式陳高宴顒顒卿士昂
昂侯甸車旗煜燦衣纓蔥蒨樂正展懸司宮飾殿三揖
稱禮九賓為傳圓鼎臨碑方壺在面鹿鳴成曲嘉魚入

樂府十五卷八
薦筐篚相輝獻酬交徧飲和飽德恩風長扇

隋皇后房內歌

儀禮曰燕歌鄉樂周南關雎葛覃卷耳召南鵲巢采芣采蘋鄭康成云王后國君夫人房中之樂歌也周南召南風化之本故謂之鄉樂用之房中以及朝庭饗燕鄉射飲酒也周官磬師掌教燕樂之鍾磬傳云燕樂房中之樂所謂陰聲也詩傳曰國君有房中之樂天子以周南諸侯以召南隋書樂志曰高祖龍潛時頗好音樂嘗倚琵琶作歌二章名曰地厚天高託言夫婦之

義牛弘修皇后房內之樂因取之爲房內曲命婦人并登歌上壽竝用之煬帝大業初栢顧言議以爲房內樂者主爲王后弦歌諷誦以事君子故以房室爲名其樂必有鍾磬乃益歌鍾歌磬土革絲竹副之并升歌下管總名房內之樂女奴肄習朝燕用焉

至順垂典正內弘風母儀萬國訓範六宮求賢啓化進善宣功家邦載序道業斯融

晉朝饗樂章

五代會要曰晉天福四年十二月太常奏

正至王公上壽皇帝舉酒奏玄同之樂皇
帝三飲皆奏文同之樂食舉奏昭德之舞
次奏成功之舞皇帝降坐奏大同之樂其
辭竝崔悅等造唐餘錄曰天福五年十一
月冬至朝羣臣舉觴奏玄同三爵登歌奏
文同四爵登歌作羣臣飲宮懸樂作又奏
龜茲及霓裳法曲以須食畢於時眾聞龜
茲法曲雅鄭雜糅固已非之明年正旦上
壽登歌發聲悲離煩慙如虞殯薤露之音
觀者以為不祥

初舉酒文同樂

赫矣昌運明哉聖皇文興墜典禮復舊章鴛鸞濟濟鳥
獸蹒蹒一人有慶萬福無疆

舉酒

大明御宇至德動天君臣慶會禮樂昭宣劔佩成列金
石在縣椒觴再獻寶歷萬年

再舉酒

朝野無事寰瀛大康聖人有作盛禮重光萬國執玉千
官奉觴南山永固地久天長

四舉酒

八表歡無事三秋賀有成照臨同日遠渥澤竝雲行河
變千年色山呼萬歲聲願修封岱禮方以稱文明

羣臣酒行歌

劍佩儼如林齊傾拱北心渥恩頒美祿咸護聽和音一
德君臣合重瞳日月臨歌時兼樂聖唯待贊泥金
萬國咸歸禹千官共祝堯拜恩瞻鳳展傾耳聽雲韶運
啓金行遠時和玉燭調酒酣齊林舞同賀聖明朝
令節陳高會羣臣侍御筵玉墀畱愛景金殿藹祥煙振
鷺涵天澤靈禽下樂懸聖朝無一事何處讓堯年

周朝饗樂章

唐餘錄曰周元正冬至朝饗樂公卿入奏
忠順皇帝坐奏治順羣臣上壽奏福順皇
帝舉壽酒登歌奏康順羣臣降階公卿出

竝奏忠順

忠順

歲迎夏始節及朝元冕旒仰止冠劍相連八音合奏萬
物齊言常陳盛禮願永千年

忠順

明君當宁列辟奉觴雲容表瑞日影初長衣冠濟濟鍾
磬洋洋令儀克盛嘉會有章

治順

庭陳大樂坐當太微凝旒負展端拱垂衣鴛鴦成列簪
組相輝御鑪香散郁郁霏霏

福順

聖皇端拱多士輸忠蠻觴共獻臣心畢同聲齊嵩嶽祝
比華封千齡萬祀常保時雍

康順

鴻鈞廣運嘉節良辰列辟在位萬國來賓干旄屢舞金
石咸陳禮容既備帝履長春

忠順

禮成三爵樂畢九成芙蓉離金祀復列彤庭

忠順

明庭展禮爲龍爲光咸韶息韻鸛鷺歸行

隋大射登歌

周禮曰射人掌以射法治射儀王以騶虞

九節諸侯以狸首七節大夫以采蘋士以

采繁皆五

一作

節射義曰騶虞者樂官備

也狸首者樂會時也采蘋者樂循法也采

繁者樂不失職也是故天子以備官爲節

諸侯以時會天子爲節大夫以循法爲節

士以不失職爲節傳云騶虞采蘋采繁皆

樂章名狸首逸唐書樂志曰大射皇帝奏

騶虞之曲皇太子奏狸首之曲會要曰王

公射亦奏狸首其設懸奏樂如元會之儀

按禮記載狸首詩曰曾孫侯氏四正具舉

大夫君子凡以庶士小大莫處御于君所

以燕以射則燕則譽蓋逸詩云

道謚金科照時又玉條明優賢饗禮洽選德射儀成鸞
旗鬱雲動寶軼儼天行巾車整三乏司裘飾五正鳴球
響高殿華鐘震廣一作庭庭烏號傳管美淇衛著前名揖
讓皆時傑升降盡朝英附枝觀體定杯水觀心平豐觚
既來去燔炙復從橫欣看禮樂盛喜遇黃河清

樂府詩集卷第十五

東吳毛晉訂正

男辰再訂

樂府詩集卷第十六

太原

郭茂倩

編次

鼓吹曲辭

鼓吹曲一曰短簫鏡歌劉瓛定軍禮云鼓
吹未知其始也漢班壹雄朔野而有之矣
鳴笳以和簫聲非八音也騷人曰鳴篴吹
竽是也蔡邕禮樂志曰漢樂四品其四曰
短簫鏡歌軍樂也黃帝岐伯所作以建威
揚德風敵勸士也周禮大司樂曰王師大
獻則令奏愷樂大司馬曰師有功則愷樂
獻于社鄭康成云兵樂曰愷獻功之樂也

春秋曰晉文公敗楚於城濮左傳曰振旅愷以入司馬法曰得意則愷樂愷歌以示喜也宋書樂志曰雍門周說孟嘗君鼓吹于不測之淵說者云鼓自一物吹自竿籟之屬非簫鼓合奏別爲一樂之名也然則短簫饒歌此時未名鼓吹矣應劭漢鹵簿圖唯有騎執鞞鞞卽笳不云鼓吹而漢世有黃門鼓吹漢享宴食舉樂十三曲與魏世鼓吹長簫同長簫短簫伎錄竝云絲竹合作執節者歌又建初錄云務成黃爵玄雲遠期皆騎吹曲非鼓吹曲此則列於殿

庭者名鼓吹今之從行鼓吹爲騎吹二曲異也又孫權觀魏武軍作鼓吹而還此應是今之鼓吹魏晉世又假諸將帥及牙門曲蓋鼓吹斯則其時方謂之鼓吹矣按西京雜記漢大駕祠甘泉汾陰備千乘萬騎有黃門前後部鼓吹則不獨列於殿庭者名鼓吹也漢遠如期曲辭有雅樂陳及增壽萬年等語馬上奏樂之意則遠期又非騎吹曲也晉中興書曰漢武帝時南越加置交趾九真日南合浦南海鬱林蒼梧七郡皆假鼓吹東觀漢記曰建初中班超拜

樂府十一卷二
長史假鼓吹麾幢則短簫鏡歌漢時已名
鼓吹不自魏晉始也崔豹古今註曰漢樂
有黃門鼓吹天子所以宴樂羣臣也短簫
鏡歌鼓吹之一章爾亦以賜有功諸侯然
則黃門鼓吹短簫鏡歌與橫吹曲得通名
鼓吹但所用異爾漢有朱鷺等二十二曲
列於鼓吹謂之鏡歌及魏受命使繆襲改
其十二曲而君馬黃雉子班聖人出臨高
臺遠如期石留務成玄雲黃爵鈞竿十曲
竝仍舊名是時吳亦使韋昭改製十二曲
其十曲亦因之而魏吳歌辭存者唯十二

曲餘皆不傳晉武帝受禪命傅玄製二十
二曲而玄雲鈞竿之名不改舊漢宋齊竝
用漢曲又充庭十六曲梁高祖乃去其四
留其十二更制新歌合四時也北齊二十
曲皆改古名其黃爵鈞竿略而不用後周
宣帝革前代鼓吹制爲十五曲竝述功德
受命以相代本抵多言戰陣之事隋制列
鼓吹爲四部唐則又增爲五部部各有曲
唯羽葆諸曲備叙功業如前代之制初魏
晉之世給鼓吹甚輕牙門督將五校悉有
鼓吹宋齊已後則甚重矣齊武帝時壽昌

殿南閣置白鷺鼓吹二曲以爲宴樂陳後
主常遣宮女習北方簫鼓謂之代北酒酣
則奏之此又施於燕私矣按古今樂錄有
梁陳時宮懸圖四隅各有鼓吹樓而無建
鼓鼓吹樓者管蕭史吹簫於秦秦人爲之
築鳳臺故鼓吹陸則樓車水則樓船其在
庭則以篋虞爲樓也梁又有鼓吹熊羆十
二按其樂器有龍頭大欄鼓中鼓獨揭小
鼓亦隨品秩給賜焉周武帝每元正大會
以梁按架列於懸間與正樂合奏隋又於
按下設熊羆豹騰倚承之以象百獸之

舞唐因之

漢饒歌

古今樂錄曰漢鼓吹饒歌十八曲字多訛
誤一曰朱鷺二曰息悲翁三曰艾如張四
曰上之回五曰擁離六曰戰城南七曰巫
山高八曰上陵九曰將進酒十曰君馬黃
十一曰芳樹十二曰有所思十三曰雉子
班十四曰聖人出十五曰上邪十六曰臨
高臺十七曰遠如期十八曰石雷又有務
成玄雲黃爵釣竿亦漢曲也其辭亾或云
漢饒歌二十一無釣竿擁離亦曰翁離

朱鷺

儀禮大射儀曰建鼓在阼階西南鼓傳云建猶樹也以木貫而載之樹之跗也隋書樂志曰建鼓殷所作又棲翔鷺於其上不知何代所加或曰鵠也取其聲揚而遠聞或曰鷺鼓精也或曰皆非也詩云振振鷺鷺于飛鼓咽咽醉言歸言古之君子悲周道之衰頌聲之息飾鼓以鷺存其風流未知孰是孔穎達曰楚威王時有朱鷺合沓飛翔而來舞舊鼓吹朱鷺曲是也然則漢曲蓋因飾鼓以鷺而名曲焉宋何承天朱

路篇曰朱路揚和鸞翠蓋曜金華但盛稱路車之美與漢曲異矣

朱鷺魚以烏路訾邪鷺何食食茄下不之食不以吐將

以問誅一作諫者

思悲翁

思悲翁唐思奪我美人侵以遇悲翁也但我思蓬首一作蓬狗逐狡兔食交君梟子五梟母六拉查高飛暮安宿

艾如張

艾與刈同說文曰芟草也如讀為而猶春

秋曰星隕如雨也古詞曰艾而張羅又曰

雀以高飛奈雀何穀梁傳曰艾蘭以為防

置旃以爲轅門謂因蒐狩以習武事也蘭
香草也言艾草以爲田之大防是也若陳
蘇子卿去張機蓬艾側唐李賀云艾葉綠
花誰翦刻俱失古題本意

艾而張羅夷於何行成之四時和山出黃雀亦有羅雀
以高飛奈雀何爲此倚欲誰肯磔室

上之回

漢書曰孝武十四年匈奴入朝那蕭關遂
至彭陽使騎兵入燒回中宮候騎至雍甘
泉回中地在安定其中有宮也武帝紀曰
元封四年冬十月行幸雍祠五時通回中

道遂北出蕭關吳兢樂府解題曰漢武通
回中道後數出遊幸焉沈建廣題曰漢曲
皆美當時之事按石關宮闕名近甘泉宮
相如上林賦云歷石關歷封巒是也

上之回所中益夏將至行將北以承甘泉宮寒暑德游
石關望諸國月支臣匈奴服令從百官疾驅馳千秋萬
歲樂無極

翁離

擁離趾中可築室何用葺之蕙用蘭擁離趾中

戰城南

戰城南死郭北野死不葬烏可食爲我謂烏且爲客豪

野死諒不葬腐肉安能去子逃水深激激蒲葦冥冥梟
騎戰鬪死駑馬徘徊鳴梁築室何以南梁何北禾黍而
獲君何食願爲忠臣安可得思子良臣良臣誠可思朝
行出攻暮不夜歸

巫山高

樂府解題曰古辭言江淮水深無梁可度
臨水遠望思歸而已若齊王融想像巫山
高梁范雲巫山高不極雜以陽臺神女之
事無復遠望思歸之意也又有演巫山高
不詳所起

巫山高高以大淮水深難以逝我欲東歸害梁不爲我
集無高曳水何梁湯湯回回臨水遠望泣下霑衣遠道
之人心思歸謂之何

上陵

古今樂錄曰漢章帝元和中
有宗廟食舉六曲加重來上陵二曲爲上陵食舉後漢
書禮儀志曰正月上丁祠南郊次北郊剛
堂高廟世祖廟謂之五供禮畢以次上陵
西都舊有上陵東都之儀太官上食太常
樂奏食舉按古詞大略言神仙事不知與
食舉曲同否宋何承天上陵者篇曰上陵
者相追攀但言升高望遠傷時怨歎而已

樂府十一卷
上陵何美美下津風以寒問客從何來言從水中央桂
樹爲君船青絲爲君竿木蘭爲君櫂黃金鑿其間滄海
之雀赤翅鴻白雁隨山林乍開乍合曾不知日月明醴
泉之水光澤何蔚蔚芝爲車龍爲馬覽遨遊四海外甘
露初二年芝生銅池中仙人下來飲延壽千萬歲

將進酒

古詞曰將進酒乘大白大略以飲酒放歌
爲言宋何承天將進酒篇曰將進酒慶三
朝備繁禮薦嘉肴則言朝會進酒且以濡
鬚荒志爲戒若梁昭明太子云洛陽輕薄
子但叙遊樂飲酒而已

將進酒乘大白辨加哉詩審博放故歌心所作同陰氣
詩悉索使禹良工觀者苦

君馬黃

君馬黃臣馬蒼二馬同逐臣馬良易之有驪蔡有赭美
人歸以南駕車馳馬美人傷我心佳人歸以北駕車馳
馬佳人安終極

芳樹

樂府解題曰古詞中有云妬人之子愁殺
人君有他心樂不可禁若齊王融相思早
春日謝朓早翫華池陰但言時暮衆芳歇
絕而已

芳樹日月君亂如於風芳樹不上無心溫而鵲三而爲
行臨蘭池心中懷我悵心不可匡目不可顧妬人之子
愁殺人君有他心樂不可禁王將何似如孫如魚乎悲
矣

有所思

樂府解題曰古詞言有所思乃在大海南
何用問遺君雙珠玳瑁簪聞君有他心燒
之當風揚其灰從今已往勿復相思而與
君絕也按古今樂錄漢太樂食舉第七曲
亦用之不知與此同否若齊王融如何有
所思梁劉繪別離安可再但言離思而已

宋何承天有所思篇曰有所思思晉人曾
閔二子善養親則言生罹荼苦哀慈親之
不得見也

有所思乃在大海南何用問遺君雙珠璫瑁簪用玉紹
繚之聞君有他心拉雜摧燒之摧燒之當風揚其灰從
今以往勿復相思相思與君絕雞鳴狗吠兄嫂當知之
妃呼豨秋風肅肅晨風颺東方須臾高知之

雉子班

樂府解題曰古詞云雉子高飛止黃鵠飛
之以千里雉來飛從雌視若梁簡文帝妬
場時向隴但詠雉而已宋何承天有雉子

遊原澤篇則言避世之士抗志清霄視卿
相功名猶冰炭之不相入也

雉子班如此之干雉梁無以吾翁孺雉子知得雉子高
蜚止黃鵠蜚之以重一作千里王可思雉來蜚從雌視子趨一
雉雉子車大駕馬一無馬字滕被王送行所中堯羊蜚從王
孫行

聖人出

聖人出陰陽和美人出遊九河佳人來駢離哉何駕六
飛龍四時和君之臣剛護不道美人哉宜天子免甘星
筮樂甫始美人子舍四海

上邪

上邪我欲與君相知長命無絕衰山無陵江水爲竭冬
雷震震夏雨雪天地合乃敢與君絕

臨高臺

樂府解題田古詞言臨高臺下見清水中
有黃鵠飛翻關弓射之令我主萬年若齊
謝朓千里常思歸但言臨望傷情而已宋
何承天臨高臺篇曰臨高臺望天衢飄然
輕舉凌太虛則言超帝鄉而會瑤臺也

臨高臺以軒下有清水清且寒江有香草日以蘭黃鵠
高飛離哉翻關弓射鵠令我主壽萬年收中吾一作吉

遠如期

樂府十六卷十
一曰遠期宋書樂志有晚芝曲沈約言舊
史云詁不可解疑是漢遠期曲也古今樂
錄曰漢太樂食舉曲有遠期至魏省之

遠如期益如壽處天左側大樂萬歲與天無極雅樂陳
佳哉紛單干自歸動如驚心虞心大佳萬人還來謁者
引鄉殿陳累世未嘗聞之增壽萬年亦誠哉

石雷

石雷涼陽涼石水流為沙錫以微河為香向始蘇冷將
風陽北逝肯無敢與干揚心邪懷蘭志金安薄北方開
雷離蘭

漢饒歌

朱鷺

王僧孺

因風弄玉水映日上金堤猶持良羅繳未得異鳧鷺聞
君愛白雉兼因重碧雞未能聲似鳳聊變色如珪願識
昆明路乘流飲復棲

同前

裴憲伯

秋來懼寒勁歲去畏冰堅羣飛向葭下奮羽欲南遷暫
戲龍池側時往鳳樓前所歎恩光歇不得久聯翩

同前

陳後主

參差蒲未齊沉漾苦浮綠朱鷺戲蘋藻徘徊雷一作澗
曲澗曲多巖樹逶迤復斷續振振雖以剛湯湯今又矚

同前

張正見

金堤有朱鷺刷羽望滄瀛周詩振雅曲漢鼓發奇聲時
將赤雁竝乍逐彩鷺行別有翻潮處異色不相驚

同前

蘇子卿

玉山一朱鷺容與入王畿欲向天池飲還遶上林飛金
堤曬羽翻丹水浴毛未非貪葢下食懷恩自遠歸

同前

張籍

翩翩兮朱鷺來汎春塘棲綠樹羽毛如翦色如染遠飛
欲下雙翅斂避人引子入深澗動處水紋開灑灑誰知
豪家網爾軀不如飲啄江海隅

艾如張

蘇子卿

誰在閭門外羅家諸少年張機蓬艾側結網槿籬邊若

能飛自勉豈爲繒所纏黃雀儻爲誠朱絲猶可延

同前

李賀

錦襜褕繡襜襦強強飲啄哺爾雛隴東卧穉滿風雨莫
信一作逐龍媒隴西去齊人一作人織網如素空張在野春
平碧中網絲漠漠無形影誤爾觸之傷昔紅艾葉綠花
誰翦刻中藏禍機不可測

上之回

簡文帝

前旆拂回中後車隅桂宮輕絲臨雲罕春色繞川風桃
林方灼灼柳路日瞳瞳笳聲駭胡騎清磬警山戎微臣
今拜手願帝永無窮

同前

張正見

林光稱避暑回中乃吉行龍媒躡影馱玉輦御雲輕風
烏繞鳩鵲綵鷄照昆明欲知鍾箭遠遙聽寶鷄聲

同前

蕭 愨

發朝城西時回輿事北遊山寒石道凍葉下故宮秋朔
路一作落傳清警邊風卷畫旒歲餘巡省畢擁仗返皇州

同前

陳子良

承平重遊樂詔蹕上之回屬車響流水清笳轉落梅嶺
雲蓋道轉巖花映綬開下輦偃高宴何如在瑤臺

同前

盧照隣

回中道路險蕭關烽候多五營屯北地萬乘出西河單
于拜玉璽天子按琫戈振旅汾川曲秋風橫大歌

同前

李 白

三十六離宮樓臺與天通閣道步行月美人愁烟空恩
疎寵不及桃李傷春風淫樂意何極金輿向回中萬乘
出黃道千旗揚綵虹前軍細柳北後騎甘泉東豈問胃
川老寧邀襄野童秋暮一作暮搖池宴歸來樂未窮

同前

李 賀

上之回大旗喜懸虹彗撻鳳尾劍匣被舞蛟龍虫尤死
鼓逢逢大高慶雷齊墜地地無驚烟海千里

戰城南

吳 均

躑躅青驪馬往戰城南畿五歷魚麗陣三入九重圍名
懼武安將血汗秦王衣爲君意氣重無功終不歸

同前

張正見

薊北馳胡騎城南接短兵雲屯兩陣合劍聚七星明旗
交無復影角憤有餘聲戰罷披軍策還嗟李少卿

同前

盧照隣

將軍出紫塞冒頓在烏貪笳喧雁門北陣翼龍城南珣
弓夜宛轉鐵騎曉參潭應須駐白日為待戰方酣

同前

李白

去年戰桑乾源今年戰蔥河道洗兵條支海上波放馬
天山雪中草萬里長征戰三軍盡衰老匈奴以殺戮為
耕作古來唯見白骨黃沙田秦家築城備胡處漢家還
有烽火然烽火然不息征戰一作長征無已時野戰格鬪死

敗馬號鳴向天悲烏鳶啄人腸銜飛上挂枯樹枝一作枯
士卒塗草莽將軍空爾為乃知兵者是凶器聖人不
得已而用之

同前

劉駕

城南征戰多城北無飢鷓白骨馬蹄下誰言皆有家城
前水聲苦條忽流萬古莫爭城外地城裏有閒土

同前二首

僧貫休

萬里桑乾傷茫茫古蕃壤將軍貌憔悴撫劍悲年長胡
兵尚陵逼久住亦非強邯鄲少年輩箇箇有伎倆拖槍
半夜去雪片大如掌

積中一作石有陰兵戰馬時驚蹶輕猛李陵心摧殘蘇武

節黃金鑲子甲風吹色如鐵十載不封侯茫茫向誰說

樂府詩集卷第十六

東吳毛晉訂正

男屐再訂

樂府詩集卷第十七

太原

郭茂倩

編次

鼓吹曲辭

漢鏡歌中

巫山高

虞羲

南國多奇山荆巫獨靈異雲雨麗以佳陽臺千里思勿言可再得特美君王意高唐一斷絕光陰不可遲

同前

王融

想像一作髮髻巫山高薄暮陽臺曲烟雲乍舒卷後鳥時斷

續一作舒行芳時斷續彼美如可期寤言紛狂矚無然坐相

望秋風下庭綠

同前

劉繪

高唐與巫山參差鬱相望灼爍在雲間氛氲出霞一作雲
上散雨收夕臺行雲卷晨障出没不易期嬋娟似一作以

惆悵

同前

梁元帝

巫山高不窺迴出荆門中灘聲下濺石猿鳴上逐風樹
雜山如畫林暗澗疑空無因謝神女一為出房櫳

同前

范雲

巫山高不極白日隱光暉靄靄朝雲去溟溟暮雨歸巖
懸獸無跡林暗鳥疑飛枕席竟誰慶相望空依依

同前

費昶

巫山光欲晚一作曉陽臺色依依彼美巖之曲寧知心是

非朝雲觸石起暮雨潤羅衣願解千金珮請逐大王歸

同前

王泰

迢遞巫山竦遠天新霽時樹交涼去遠草合影開遲谷
深流響咽峽近猿聲悲只言雲雨狀自有神仙期

同前

陳後主

巫山巫峽深峭壁聳春林風巖朝藥落霧嶺晚猿吟雲
來足蘼枕雨過非感琴仙姬將夜月度影自浮沉

同前

蕭詮

巫山映巫峽高高殊未窳猿聲不辨處雨色詎分空懸
崖下桂月深澗響松風別有仙雲起時向楚王宮

同前

鄭世翼

巫山凌太清，崑嶺削成。霏霏暮雨，合靄靄朝雲。生危峰入鳥道，深谷瀉猿聲。別有幽棲客，淹留攀桂情。

同前

沈佺期

巫山峰十二，環合隱昭回。俯眺琵琶峽，平看雲雨臺。古槎天外倚，瀑水日邊來。何忽啼猿夜，荆王枕席開。神女向高唐，巫山下夕陽。徘徊作行雨，婉孌逐荆王。電影江前落，雷聲峽外長。霹靂無處所，臺館曉蒼蒼。

同前

盧照隣

巫山望不極，望望下朝霞。莫辨啼猿樹，徒看神女雲。驚濤亂水脉，驟雨暗峰文。霑裳卽此地，况復遠思君。

同前

張循之

巫山高不極，杳杳奇狀新。暗谷疑風雨，幽巖若鬼神。月明三峽曙，潮滿二江春。爲問陽臺夕，應知入夢人。

同前

劉方平

楚國巫山秀，清猿日夜啼。萬重春樹合，十二碧峰齊。峽出朝雲下，江來暮雨西。陽臺歸路直，不畏向家迷。

同前

皇甫冉

巫峽見巴東，迢迢半出空。雲藏神女館，雨到楚王宮。朝暮泉聲落，寒暄樹色同。清猿不可聽，偏在九秋中。

同前

李端

巫山十二峰，皆在碧虛中。回合雲藏日，霏微雨帶風。猿

聲寒過水樹色暮連空愁向高唐望清秋見楚宮

同前

于 漬

何山無朝雲彼雲亦悠揚何山無暮雨彼雨亦蒼茫宋
玉侍才者憑雲構高堂自重文賦名荒淫歸楚襄我襄
十二峰永作妖鬼鄉

同前

孟 郊

巴山上峽重復重陽臺碧峭十二峰荆王獵時逢暮雨
夜卧高丘夢神女輕紅流烟濕艷姿行雲飛去明星稀
目極魂斷望不見猿啼三聲淚沾衣

見盡數萬里不聞三聲猿但飛蕭蕭雨中有亭亭魂千
載楚襄一作王恨遺文宋玉言至今青冥裏雲結深閨門

同前

李 賀

碧叢叢高一作齊插天大江翻瀾神曳烟楚魂尋夢風颺

一作然曉風飛雨生苔錢瑤姬一去一千年丁香筇竹

啼老猿古祠近月蟾桂寒椒花墜紅濕雲間一作端

同前

僧齊已

巫山高巫女妖雨為暮兮雲為朝楚王憔悴魂欲銷秋
猿嗥嗥日將夕紅霞紫烟凝老壁千巖萬壑花皆坼但
恐芳菲無正色不知今古行人行幾人經此無秋情雲
深廟遠不可覓十二峰頭插天碧

將進酒

昭明太子

洛陽輕薄子長安遊俠兒宜城溢渠盃中山浮羽巵

同前

李白

君不見黃河之水天上來奔流到海不復回君不見高
堂明鏡悲白髮朝如青絲暮成雪人生得意須盡歡莫
使金樽空對月天生我材必有用千金散盡還復來烹
羊宰牛且爲樂會須一飲三百杯岑夫子丹丘生將進
酒杯莫停一作君莫停與君歌一曲請君爲我傾耳聽鐘鼓
饌玉不足貴但願長醉不復醒古來聖賢一作賢達皆寂寞
唯有飲者留其名陳王昔時宴平樂斗酒十千恣歡譁
主人何爲言少錢徑須沽取一作酒對君酌五花馬千金
裘呼兒將出換美酒與爾同銷萬古愁

同前

元稹

將進酒將進酒酒中有毒醜主父言之主父傷主母母
爲妾地父妾天仰天俯地不忍言佯爲僵踣主父前主
父不知加妾鞭笞人知妾爲主說主將淚洗鞭頭血推
權主母牽下堂扶妾遣升堂上床將進酒酒中無毒令
主壽願主回思歸主母遣妾如此事一作由主父妾爲此
事人偶知自慙不密方自悲主今顛倒安置妾貪天僭
地誰不爲

同前

李賀

瑠璃鍾琥珀濃小槽酒滴真珠紅烹龍炮鳳玉脂泣羅
屏繡幕圍香風吹龍笛擊鼉鼓皓齒歌細腰舞况是青
春日將暮桃花亂落如紅雨勸君終日酪酏醉酒不到

劉伶墳上土

君馬黃

蔡知君

君馬徑西極臣馬出東方足策浮雲影珂連明月光
凍恒傷骨蹄寒為踐霜躊躇嗟伏櫪空想欲從良

同前

張正見

幽并重騎射征馬正盤桓風去長嘶遠冰堅度足寒出
關聊變色上坂屢停鞍即今隨御史非復在樓蘭
五色乘馬黃追風時滅沒血汗染龍花胡鞍抱秋月唯
騰渥洼水不飲長城窟詎待燕昭王千金市駿骨

同前

李白

君馬黃我馬白馬色雖不同人心本無隔共作遊冶盤

雙行洛陽陌長劍既照曜高冠何絕赫各有千金裘俱
為五侯客猛虎落陷穽壯夫時屈厄相知在急難獨好
亦一作知何益

芳樹

謝朓

早翫華池陰復影滄洲泄椅柅芳若斯歲蕤紛可結霜
下桂枝鋪怨與飛蓬折不厠玉盤滋誰憐終委絕

同前

王融

相望早春日烟華雜如霧復此佳麗人含情結芳樹綺
羅已自憐萱風多有趣去來徘徊者佳人不可遇

同前

梁武帝

綠樹始搖芳芳生非一葉一葉度春風芳芳自相接色

雜亂參差衆花紛重疊重疊不可思思此誰能愜

同前

梁元帝

芬芳君子樹交柯御宿園桂影含秋月桃色染春源一作

桂影含秋色
桃花染春源

落英逐風聚輕香帶藥翻叢枝臨北閣灌

木隱南軒交讓良宜重成蹊何用言

同前

費昶

幸被夕風吹屢得朝光照枝偃一作疑欲舞花開似含

笑長夜踏悠悠所思不可召行人早旋返賤妾猶年少

一作年
猶少

同前

沈約

發萼九華隈開跼寒路側氤氳非一香參差多異色宿

管寒飈舉摧殘不可識霜雪交橫至對之長歎息

同前

丘遲

芳葉已漠漠嘉實復離離發景傷雲屋凝暉覆華池輕

蜂掇浮穎弱鳥隱深枝一朝春色茂千春長不移

同前

李爽

芳樹千株發搖蕩三陽時氣軟來風易枝繁度鳥遲春

至花如錦夏近葉成帷欲寄邊城客路遠誰能持一作

詎難
持

同前

顧野王

上林通建章雜樹遍林芳日影桃蹊色風吹梅逕香幽

山桂葉落馳道柳條長折榮疑路遠用表莫相忘

同前

張正見

奇樹舒春苑流芳入綺錢合歡分四照同心彰萬年香
浮佳氣裏葉映彩雲前欲識揚雄賦金玉滿甘泉

同前

沈佺期

何地早芳菲宛在長門殿天桃色若綬穠李光如練啼
鳥弄花疎遊蜂飲香遍歎息春風起飄零君不見

同前

盧照隣

芳樹本多奇年華復在斯結翠成新幄開紅滿舊枝風
歸花歷亂日度影參差容色朝朝落思君君不知

同前

徐彥伯

玉花珍簾上金鏤畫屏開曉月憐箏柱春風憶鏡臺箏

柱春風吹曉月芳樹落花朝暝歇藁砧刀頭未有時攀
條拭淚坐相思

同前

韋應物

迢迢芳園樹列映清池曲對此傷人心還如故時綠風
條灑餘靄露葉承新旭佳人不再攀下有往來躡

同前

元稹

芳樹已寥落孤英尤可嘉可憐團團葉蓋覆深深花遊
蜂競鑽刺鬪雀亦紛拏天生細碎物不愛好光華非無
殲殄法念爾有生涯春雷一聲發驚鷺亦驚蛇清池養
神蔡已復長蝦蟇雨露貴平施吾其春草芽

同前

羅隱

樂府十卷
細葉慢逐風暖香閑破鼻青帝固有心時時動人意去
年高枝猶壓地今年低枝已憔悴吾所以見造化之權
變通之理春夏作頭秋冬爲尾循環反覆無窮已今生
長短同一軌若使威可以制力可以止秦皇不肯斂手
下沙丘孟賁不合低頭入蒿里伊人彊猛猶如此顧我
勞生何足恃但願開素袍傾綠蟻陶陶兀兀大醉於青冥
白晝間任他是天下是地

有所思

劉繪

別離安可再而我更重之佳人不相見明月空在帷
笑街滿堂酌獨斂向隅眉中心亂如雪寧知有所思

同前

王融

如何有所思而無相見時宿管夢顏色階庭尋屨綦高
張夏何已引滿終自持欲知憂能老爲視鏡中絲

同前

謝朓

佳期期未歸望望下鳴機徘徊東陌上月出行人稀

同前

梁武帝

誰言生離久適意與君別衣上芳猶在握裏書未滅腰
中雙綺帶夢爲同心結常恐所息露瑤華未忍折

同前

簡文帝

管未離長信金翠奉乘輿何言人事異夙管故恩疎寂
寞錦筵靜玲瓏玉殿虛掩闈泣團扇羅幌詠糜蕪

同前

昭明太子

公子遠于隔乃在天一方望望江山阻悠悠道路長別
前秋葉落別後春花芳雷歎一聲響雨淚忽成行悵望
情無極傾心還自傷

同前

王筠

丹墀生細草紫殿納輕陰曖曖巫山遠悠悠湘水深徒
歌鹿盧劒空貽玳瑁簪望君終不見屑淚且長一作吟

同前

庾肩吾

佳期竟一作春不歸春日坐芳菲拂匣看離扇開箱見別
衣并梧生未合宮槐卷復稀不及銜泥鷺從來相逐飛

同前

王僧孺

夜風吹熠燿朝光照管耶幾銷蕪蕪葉空落蒲桃花不

堪長織素誰能獨浣沙光陰復何極望促反成賒知君
自蕩子奈妾亦倡家

同前

吳均

薄暮有所思終持淚煎骨春風驚我心秋露傷君髮

同前

沈約

西征登隴營東望不見家關樹抽紫葉塞草發青牙昆
明當欲滿蒲葦應作花坐淚對漢使因書寄狹邪

同前

費昶

上林鳥欲飛長門日行一作將暮所息鬱不見空想丹墀
步簾動意君來雷聲似車度北方佳麗子窈窕能回顧
夫君自迷惑非為妾心妬

同前

陳後主

蕩子好蘭期，畱人獨自息。落花同淚臉，初月似愁眉。階
前看草夢，窓中對網絲。不言千里望，復是三春時。
杳杳與人期，遙遙有所息。山川千里間，風月兩邊相。
待春那劇相，望近偏遲當。由分別久，夢來還自疑。
佳人在北燕，相望渭橋邊。團團落日樹，耿耿曙河天。愁
多明月下，淚盡雁行前。別心不可寄，唯餘琴上絃。

同前

顧野王

賤妾有所息，良人久征戍。笳鳴塞表城，一作笳鳴花開
落芳樹。白登澄月色，黃龍起烟霧。還聞雉子班，非復長
征賦。

同前

張正見

深閨久離別，積怨轉生愁。徒息裂帛雁，空上望歸樓。看
花憶塞草，對月想邊秋。相思日日度，淚臉年年流。

同前

陸系

別念恨城闔，還思樓上人。淚想離前落，愁聞別後新。月
來疑舞扇，花度憶歌塵。只看今夜裏，那似隔河津。

同前

裴讓之

夢中雖暫見，及覺始知非。展轉不能寐，徒倚獨披衣。悽
悽曉風急，晻晻月光微。室空常達旦，所思終不歸。

同前

盧思道

長門與長信，憂息竝難任。洞房明月下，空庭綠草深。怨

歌裁絮一作統素能賦受黃金復聞隔湘水猶言限桂林
悽悽日已暮誰見此時心

同前

沈佺期

君子事行役再空芳歲期美人曠延佇萬里浮雲思園
槿綻紅豔郊桑柔綠滋坐看長夏晚秋月生羅幃

同前

李白

我思仙一作佳人乃在碧海之東隅海寒多天風白波連

山一作天

倒蓬壺長鯨噴湧不可涉撫心茫茫淚如珠西

來青鳥東飛去願寄一書謝麻姑

同前

孟郊

桔槔烽火晝不滅客路迢迢信難越古鎮刀攢萬片霜

寒江浪起千堆雪此時西去定如何空使南心遠淒切

同前

盧仝

當時我醉美人家美人顏色嬌如花今日美人棄我去
青樓珠箔天之涯天涯娟娟常娥月三五二八盈又缺
翠睂蟬鬢生別離一望不見心斷絕心斷絕幾千里夢
中醉臥巫山雲覺來淚滴湘江水湘江兩岸花木深美
人不見愁人心含愁更奏綠綺琴調高絃絕無知音美
人兮美人不知爲暮雨兮爲朝雲相思一夜梅花發忽
到窓前疑是君

同前

韋應物

借問江上柳青青爲誰春空遊昨日地不見昨日人繚

繞萬家井往來車馬塵莫道無相識要非心所親

同前

劉氏雲

朝亦有所息暮亦有所息登樓望君處藹藹浮雲飛浮雲遮却陽關道向晚誰知妾懷抱玉井蒼苔春院深桐花落地無人掃

樂府詩集卷第十七

東吳毛晉訂正

男辰再訂

樂府詩集卷第十八

太原

郭茂倩

編次

鼓吹曲辭

漢鏡歌下

雉子班

吳均

可憐雉子班羣飛集野甸文章始陸離意氣已驚狎幽并遊俠子直心亦如箭死節報君恩一作以死報君恩誰能孤恩眄

同前

陳後主

四野秋原暗十步啄方前雉聲風處遠翅影雲間連箭射妖姬笑裘值盛明然已足南皮賞復會北宮篇

同前

張正見

陳倉雉未飛歛翮依芳甸朱冠色尚淺錦臆毛初變
雉麥且專場排花聊勇戰唯當渡弱水不怯如臯箭

同前

毛處約

春物始芳菲春雉正相追澗響連朝雉花光帶錦衣
窠跡時移影驚媒或亂飛能使如臯路相逢巧笑歸

同前

江總

麥壘新秋來澤雉屢徘徊依花似協妬拂草乍驚媒
三春桃照李二月柳爭梅暫往如臯路當令巧笑開

同前

李白

古今樂錄曰梁三朝樂第四十一設辟邪

伎鼓吹作雉子班曲引去來

辟邪伎作鼓吹驚雉子班之奏曲成喔咿振迅欲飛鳴
扇錦翼雄風生雙雌同飲啄趨悍詐能爭乍向草中取
介死不求黃金籠下生天地至廣大何憺遂物情善卷
讓天子務光亦逃名所貴曠士懷朗然合太清

臨高臺

魏文帝

臨臺行高高以軒下有水清且寒中有黃鵠往且翻行
為臣當盡忠願令皇帝陛下三千歲宜居此宮鵠欲南
遊雌不能隨我欲躬銜汝口噤不能開欲負之毛衣摧
頽五里一顧六里徘徊

同前

謝朓

千里常思歸登臺臨綺翼纔見孤鳥還未辨連山極四面動春風朝夜起寒色誰知倦遊者嗟此故鄉憶

同前

王融

遊人欲騁望積步上高臺井蓮當夏吐窓桂逐秋開花飛低不入鳥散遠時來還看雲棟一作影含月共徘徊

同前

簡文帝

高臺半行雲望望高不極草樹無參差山河同一色髣髴洛陽道遠難別識玉階故情人情來共相憶

同前

沈約

高臺不可望望遠使人愁連山無斷續河水復悠悠所思暖何在洛陽南陌頭可望不可至何用解人憂

同前

陳後主

晚景登高臺迴一作望春光來霧濃山後暗日落雲傷開烟裏看鴻小風來望葉回臨窓已響吹極眺且傾杯

同前

張正見

曾臺邈清漢出迴架重禁飛棟臨黃鶴高窓度白雲風前朱幌一作色霞處綺疎分此中多怨曲地遠詎能聞

同前

蕭愨

崇臺高百尺迴出望仙宮畫楫浮朝一作氣飛梁照晚

虹小衫飄霧縠艷粉拂輕紅笙吹汶陽篠琴奏嶧山桐舞逐飛龍引花隨少女風臨春今若此極燕豈無窮

同前

褚亮

高臺暫俯臨飛翼聳輕音浮光隨日度漾影逐波深迴
瞰周平野開懷暢遠襟獨此三休上還傷千歲心

同前

王勃

臨高臺高臺迢遞絕浮埃瑤軒綺構何崔嵬鸞歌鳳吹
清且哀俯瞰長安道萋萋御溝草斜對甘泉路蒼蒼茂
陵樹高臺四望同帝鄉佳氣鬱蔥蔥紫閣丹樓紛照耀
璧房錦殿相玲瓏東轡長樂觀西指未央宮赤城映朝
日綠樹搖春風旗亭百隊開新市甲第千甍分戚里朱
輪翠蓋不勝春疊樹層一作重楹相對起復有青樓大道
中繡戶文窓雕綺櫳錦衣晝不褻羅幃夕未空歌屏朝
揜翠粧鏡晚窺紅爲吾安寶髻蛾眉花叢狹路塵問

黯將暮雲間月色明如素鴛鴦池上兩兩飛鳳凰樓下
雙雙度物色正如此佳期那不顧銀鞍繡轂盛繁華可
憐今夜宿倡家倡家少婦不須嘔東園桃李片時春君
看舊日高臺處柏梁銅雀生黃塵

同前

僧貫休

涼風吹遠念使我升高臺寧知數片雲不是舊山來故
人天一涯久客殊未回雁來不得書空寄聲哀哀

遠期

張率

遠期終不歸節物坐將一作遷變白露愴單衫秋風息團
扇誰能久離別他鄉且異縣浮雲蔽重山相望何時見
寄言遠期者空閨淚如霰

同前

庾成師

憶別春花飛已見秋葉稀
淚粉羞明鏡愁帶減寬衣
得書言未及夢見道應歸
坐使紅顏歇獨掩青樓扉

玄雲

張率

壞陣壓峨壘遮牕暗
思扉映日斜生海跨樹似鵬
飛夢山妾已去落鬢何由歸

黃雀行

莊南傑

穿屋穿墻不知止爭樹爭巢
入營死林間公子挾彈弓
一丸致斃花叢裏小雛黃口
未有知青天不解高高飛
虞人設網當要路白日啾啾
禍萬機

釣竿

魏文帝

崔豹古今注曰釣竿者伯常子避仇河濱
為漁者其妻息之而作也每至河側輒歌
之後司馬相如作釣竿詩遂傳為樂曲

東越河濟水遙望大海涯
釣竿何珊珊魚尾何筵筵
行路之好者芳餌欲何為

同前

沈約

桂舟既容與綠浦復回紆
輕絲動弱芰微楫起單鳧扣
舷忘日暮卒歲以為娛

同前

戴嵩

試持玄渚釣斃罷池陽獵翠羽
飾長綸藻花裝小緹鉅
利斷蓴絲汎舉牽菱葉聊載前
魚童過看後舟妾

同前

劉孝綽

釣舟畫采鷁魚于服冰執金轄茱萸網銀鈎翡翠竿歛
橈隨水脉急漿渡江湍湍長自不辭前浦有佳期船交
棹影合浦深魚出遲荷根時觸餌菱芒乍習絲蓮渡江
南手衣渝京兆看垂竿自來樂誰能為太師

釣竿篇

張正見

結宇長江側垂釣廣川潯竹竿橫翡翠桂髓擲黃金入
來水鳥沒檝渡岸花沈蓮搖見魚近綸盡覺潭深渭水
終須卜滄浪徒自吟空嗟芳餌下獨見有貪心

同前

李巨仁

潺湲面江海混濘瀆波瀾不愔黃金餌唯憐翡翠竿斜

綸控急水定檝下飛湍潭迴一作風來易川長霧歇難
寄言朝市客滄浪徒自安

同前

沈佺期

朝日歛紅烟垂竿向綠川人疑天上坐魚似鏡中懸避
檝時驚透猜鈎每誤牽湍危不理轄潭靜欲畱船釣玉
君徒尚徵金我未賢為看芳一作餌下貪得會無全

魏鼓吹曲

繆襲

晉書樂志曰魏武帝使繆襲造鼓吹十二
曲以代漢曲一曰楚之平二曰戰滎陽三
曰獲呂布四曰克官渡五曰舊邦六曰定
武功七曰屠柳城八曰平南荆九曰平關

樂府十八卷之
中十曰應帝期十一曰苞熙十二曰太和
楚之平

晉書樂志曰改漢朱鷺爲楚之平言魏也
古今樂錄作初之平

楚之平義兵征神武奮金鼓鳴邁武德揚洪名漢室微
社稷傾皇道失桓與靈關官熾羣雄爭邊韓起亂金城
中國擾無紀經赫武皇起旗旌麾天下天下平濟九州
九州寧割武功武功成越五帝邈三王興禮樂定紀綱
普日月齊輝光

楚之平曲凡三十句句三字

戰榮陽

晉書樂志曰改漢思悲翁爲戰榮陽言曹
公也

戰榮陽汴水陂戎士憤怒貫甲馳陣未成退徐榮二萬
騎塹壘平戎馬傷六軍驚勢不集衆幾傾白日沒時晦
冥顧中牟心屏營同盟疑計無成賴我武皇萬國寧

戰榮陽曲凡二十句其十八句句三字二
句句四字

獲呂布

晉書樂志曰改漢艾如張爲獲呂布言曹
公東圍臨淮生擒呂布也

獲呂布戮陳宮芟夷鯨鯢驅騁羣雄囊括天下運掌中

獲呂布曲凡六句句其三句句三字三句句四字

克官渡

晉書樂志曰改漢上之回為克官渡言曹公與袁紹戰破之於官渡也

克紹官渡由白馬僵屍流血被原野賊眾如犬羊王師尚寡沙埽旁風飛揚轉戰不利士卒傷今日不勝後何望土地道不可當卒勝大捷震冀方屠城破邑神武遂章

克官渡曲凡十八句句八句句四句一句五字九句句三字

舊邦

晉書樂志曰改漢翁離為舊邦言曹公勝袁紹於官渡還譙收藏死士卒也

舊邦蕭條心傷悲孤魂翩翩當何依遊士戀故涕如摧兵起事大令願違傳求親戚在者誰立廟置後魂來歸舊邦曲凡十二句句六句句三字六句句

四字

定武功

晉書樂志曰改漢戰城南為定武功言曹公初破鄴武功之定始乎此也

定武功濟黃河河水湯湯日暮有橫流波袁氏欲衰兄弟

樂府十八卷八
尋干戈決漳水流滂沱嗟城中如流魚誰能復顧室
家計窮慮盡求來連和和不時心中憂戚賊衆內潰君
臣奔北拔鄴城奄有魏國王業艱難覽觀古今可爲長
歎

定武功曲凡二十一句其五句句三字三
句句六字十二句句四字一句五字

屠柳城

晉書樂志曰改漢巫山高爲屠柳城言曹
公越北塞歷白檀破三郡烏桓於柳城也
屠柳城功誠難越度隴塞路湯湯北踰岡平但聞悲風
正酸蹋頓授普遂登白狼山神武懋海外永無北顧患

屠柳城曲凡十句其三句句三字三句句
四字三句句五字一句六字

平南荆

晉書樂志曰改漢上陵爲平南荆言曹公
南平荆州也

南荆何遼遠江漢濁不清善茅久不貢王師赫南征劉
琮據襄陽賊備屯樊城六軍廬新野金鼓震天庭劉子
面縛至武皇許許其成許與其成撫其民陶陶江漢
間普爲大魏臣大魏臣向風思自新思自新齊功古人
在晉虞與唐大魏得與均多選忠義士爲喉脣天下一
定萬世無風塵

平南荆曲凡二十四句其十七句句五字
四句句三字三句句四字

平關中

晉書樂志曰改漢將進酒為平關中言曹
公征馬超定關中也

平關中路由潼濟濁水立高墉關韓馬離羣凶選驍騎
縱兩翼虜崩潰級萬億

平關中曲凡十句句三字

應帝期

晉書樂志曰改漢有所思為應帝期言文
帝以聖德受命應運期也

應帝期於昭我文皇歷數承天序龍飛自許昌聰明昭
四表恩德動遐方星辰為垂耀日月為重光河洛吐符
瑞草木挺嘉祥麒麟步郊野黃龍遊津梁白虎依山林
鳳凰鳴高岡考圖定篇籍功配上古義皇義皇無遺文
仁聖相因循期運三千歲一生聖明君堯授舜萬國萬
國皆附親四門為穆穆教化常如神大魏興盛一作與
之為鄰

應帝期曲凡二十六句其一句三字二句
句四字二十二句句五字一句六字

邕熙

晉書樂志曰改漢芳樹為邕熙言魏氏臨

其國君臣邕穆庶績咸熙也

邕熙君臣念德天下治登帝道獲瑞寶頌聲竝作洋洋浩浩吉日臨高堂置酒列名倡歌聲一何紆餘雜笙簧八音諧有紀綱子孫永建萬國壽考樂無央

邕熙曲凡十五句其六句句三字三句句四字一句上字三句句五字二句句六字

太和

晉書樂志曰改漢上邪為太和言剛帝繼體承統太和改元德澤流布也

惟太和元年皇帝踐阼聖且仁德澤為流布災蝗一時為絕息上天時雨露五穀溢田疇四民相率遵軌度事

務徵清天下獄訟察以情元晉剛魏家如此那得不太平

太和曲凡十三句其二句句三字五句句五字三句句四字三句句七字

吳鼓吹曲

韋昭

晉書樂志曰吳使韋昭製鼓吹十二曲一曰炎精缺二曰漢之季三曰據武師四曰伐烏林五曰秋風六曰克皖城七曰關背德八曰通荆門九曰章洪德十曰從歷數十一曰承天命十二曰玄化

炎精缺

古今樂錄曰炎精缺者言漢室衰孫堅奮
迅猛志念在匡救王迹始乎此也當漢朱

鷺

炎精缺漢道微皇綱弛政德違衆姦熾民罔依赫武烈
越龍飛陟天衢耀靈威鳴雷鼓抗電麾乾衡鎮地機
厲虎旅騁熊羆發神聽吐英奇張角破邊韓羈宛頽平
南土 綏神武章渥澤施金聲震仁風馳顯高門啓
皇基統罔極垂將來

炎精缺曲凡三十句句三字

漢之季

古今樂錄曰漢之季者言孫堅悼漢之微

痛董卓之亂興兵奮擊功益海內也當漢
思悲翁

漢之季董卓亂相武烈應時運義兵興雲旗建厲六
師羅八陣飛鳴鏑接白刃輕騎發介士奮醜虜震使衆
散劫漢主遷西館雄豪怒无惡積赫赫皇祖功名聞

漢之季曲凡二十句其十八句句三字二

句句四字

攄武師

古今樂錄曰攄武師者言孫權卒父之業
而征伐也當漢艾如張

攄武師斬黃祖搆夷凶族革平西夏炎炎大烈震天下

武師曲凡六句其三句句三字三句句

四字

伐烏林

古今樂錄曰伐烏林者言魏武既破荊州順流東下欲來爭鋒孫權命將周瑜逆擊

之於烏林而破走也當漢上之回

曹操北伐拔柳城乘勝席卷遂南征劉氏不睦八郡震驚眾既降操屠荆舟車十萬揚風聲議者狐疑慮無成賴我大皇發聖明虎臣雄烈周與程破操烏林顯章功

名

伐烏林曲凡十八句其十句句四字八句

句三字

秋風

古今樂錄曰秋風者言孫權悅以使民民

忘其死也當漢擁離

秋風揚沙塵寒露沾衣裳角弓持弦急鳩鳥化為鷹邊垂飛羽檄寇賊侵界疆跨馬披介冑慷慨懷悲傷辭親向長路安知存與亡窮達固有分志士思立功思立功邀之戰場身逸獲高貴身沒有遺封

秋風曲凡十六句其十四句句五字一句

三字一句四字

克皖城

卷十三

古今樂錄曰克皖城者言魏武志圖并兼而令朱光爲廬江太守孫權親征光破之於皖城也當漢戰城南

克滅皖城遏寇賊惡此凶孽阻姦慝王師赫征衆傾覆除穢去暴戢兵革民得就農邊境息誅君弔臣昭至德克皖城曲凡十二句其六句句三字六句句四字

關背德

古今樂錄曰關背德者言蜀將關羽背棄吳德心懷不軌孫權引師浮江而擒之也當漢巫山高

關背德作鴟張割我邑城圖不祥稱兵北伐圍樊襄陽嗟臂大於股將受其殃巍巍夫聖主睿德與玄通與玄通親任呂蒙泛舟洪汜池溯涉長江神武一何栢栢聲烈正與風翔歷撫江安城大據鄂邦虜羽授首百蠻咸來同盛哉三比隆

關背德曲凡二十一一句其八句句四字二句句六字七句句五字四句句三字

通荆門

古今樂錄曰通荆門者言孫權與蜀交好齊盟中有關羽自失之讐戎蠻樂亂生變作患蜀疑其眩吳惡其詐乃大治兵終復

初好也當漢上陵

荆門限巫山高峻與雲連蠻夷阻其險歷世懷不賓漢
王據蜀郡崇好結和親乖微中情疑讒夫亂其間大皇
赫斯一作斯怒虎臣勇氣震蕩滌幽數討不恭觀兵揚炎
耀厲鋒整封疆整封疆闡揚威武容功赫戲洪烈炳章
邈矣帝皇世聖吳同厥風荒裔望清化化恢弘煌煌大
吳延祚永未央

通荆門曲凡二十四句其十七句句五字

四句句三字三句句四字

章洪德

古今樂錄曰章洪德者言孫權章其大德

而遠方來附也當漢將進酒

章洪德邁威神感殊風懷遠鄰平南裔齊海濱越裳貢
扶南臣珍貨充庭所見日新

章洪德曲凡十句其八句句三字二句句

四字

從歷數

古今樂錄曰從歷數者言孫權從圖籙之
符而建大號也當漢有所思

從歷數於穆我皇帝聖哲受之天神明表奇異建號創
皇基聰睿協神思德澤浸及昆蟲浩蕩越前代三光顯
精耀陰陽稱至治肉角步郊畛鳳凰棲靈囿神龜遊沼

池圖讖摹文字黃龍覲鱗符祥日月記覽往以察今我
皇多噲事上欽昊天象下副萬姓意光被彌蒼生家戶
蒙惠賚風教肅以平頌聲章嘉喜大吳興隆綽有餘裕
從歷數曲凡二十六句其一句三字三句
句四字二十二句句五字一句六字

承天命

古今樂錄曰承天命者言上以聖德踐位
道化至盛也當漢芳樹

承天命於昭聖德三精垂象符靈表德巨石立九穗植
龍金其鱗鳥赤其色輿人歌億夫歎息超龍升襲帝服
窮淳懿體玄嘿夙興臨朝勞謙曰昃易簡以崇仁放遠

讒與慝舉賢才親近有德均田疇茂稼稽審法令定品
式考功能明黜陟人思自盡唯心與力家國治王道直
思我帝皇壽萬億長保天祿祚無極

承天命曲凡三十四句其十九句句三字
二句句五字十三句句四字

玄化

古今樂錄曰玄化者言上脩文訓武則天
而行仁澤流洽天下喜樂也當漢上邪

玄化象以天陛下聖真張皇綱率道以安民惠澤宣流
而雲布上下睦親君臣酣宴樂激發絃歌揚妙新脩文
籌廟勝須時備駕巡洛津康哉泰四海歡忻越與三五

鄰

玄化曲凡十三句其五句句五字二句句
三字三句句四字三句句七字

樂府詩集卷第十八

東吳毛晉訂正

男展再訂

樂府詩集卷第十九

太原

郭茂倩

編次

鼓吹曲辭

晉鼓吹曲

傅玄

晉書樂志曰武帝令傅玄製鼓吹曲二十
二篇以代魏曲一曰靈之祥二曰宣受命
三曰征遼東四曰宣輔政五曰時運多難
六曰景龍飛七曰平玉衡八曰文皇統百
揆九曰因時運十曰惟庸蜀十一曰天序
十二曰大晉承運期十三曰金靈運十四
曰於穆我皇十五曰仲春振旅十六曰夏

苗田十七曰仲秋獮田十八曰順天道十
九曰唐堯二十曰玄雲二十一曰伯益二
十二曰鈞竿

靈之祥

古朱鷺行古今樂錄曰靈之祥言宣皇帝
之佐魏猶虞舜之事堯也既有石瑞之徵
又能用武以誅孟度之逆命也

靈之祥石瑞章旌金德出西方天降命授宣皇應期運
時龍驤繼大舜佐陶唐讚武文建帝綱孟氏叛據南疆
追有扈亂五常吳寇勁蜀虜疆交誓盟連遐荒宣赫怒
奮鷹揚震乾威曜電光陵九天陷石城梟逆命拯有生

萬國安四海寧

宣受命

古思悲翁行古今樂錄曰宣受命言宣皇
帝禦諸葛亮養威重運神兵亮震怖而死
宣受命應天機風雲時動神龍飛禦葛亮鎮雍梁邊境
安夷夏康務節事勤定傾攬英雄保持盈淵穆赫明
明冲而泰天之經養威重運神兵亮乃震斃一作死天下
寧

征遼東

古艾而張行古今樂錄曰征遼東言宣皇
帝陵大海之表討滅公孫淵而梟其首也

樂府十九卷二
征遼東敵失據威靈邁日域公孫既授首羣逆破膽咸
震怖朔北響應海表景附武功赫赫德雲布

宣輔政

古上之回行古今樂錄曰言宣皇帝聖道
深遠撥亂反正網羅文武之才以定二儀
之序也

宣皇輔政聖烈深撥亂反正從天心網羅文武才慎厥
所生所生賢遺教施安上治民化風移肇創帝基洪業
垂於鏢明明時赫戲功濟萬世定二儀雲澤雨施海外
風馳

時運多難

古擁離行古今樂錄曰時運多難言宣皇
帝致討吳方有征無戰也

時運多難道教痛天地變化有盈虛蠢爾吳蠻虎視江
湖我皇赫斯致天誅有征無戰弭其圖天威橫被廓東
隅

景龍飛

古戰城南行古今樂錄曰景龍飛言景帝
克明威教賞從夷逆祚隆無疆崇此洪基
也

景龍飛御天威聰鑒玄察動與神明協機從之者顯逆
之者滅夷文教敷武功巍普被四海萬邦望風莫不來

綏聖德潛斷先天弗違弗違祥享世永長猛以致寬道
化光赫明曜祚隆無疆帝績惟期有命既集崇此洪基

平玉衡

古巫山高行古今樂錄曰平玉衡言景帝
一萬國之殊風齊四海之乖心禮賢養士
而纂洪業也

平玉衡紜姦回萬國殊風四海乖禮賢養士羈御英雄
息心齊纂戎洪業崇皇階品物咸亨聖敬日躋聰鑒盡
下情明曜綜天機

文皇統百揆

古上陵行古今樂錄曰文皇統百揆言文

皇帝始統百揆用人有序以敷太平之化
也

文皇統百揆繼天理萬方武將鎮四隅英佐盈朝堂謀
言協秋蘭清風發其芳洪澤所漸潤礫石為珪璋大道
侔一作謀五帝盛德踰三王咸光大上參天與地並一作至
化無內外無內外六合並康又並康又並茲嘉會在管
義與農大晉德斯邁鎮征及諸州為蕃衛玄功濟四海
洪烈流萬世

因時運

古將進酒行古今樂錄曰因時運言文皇
帝因時運變聖謀潛施解長蛇之交離羣

桀之黨以武濟文審其大計以邁其德也
因時運聖策施長蛇交解羣桀離勢窮奔吳虎騎厲惟
武進審大計時邁其德清一世

惟庸蜀

古有所思行古今樂錄曰惟庸蜀言文皇
帝既平萬乘之蜀封建萬國復五等之爵

也

惟庸蜀僭號天一隅劉備逆帝命禪亮承其餘擁眾數
十萬闕隙乘我虛驛騎進羽檄天下不遑居姜維屢寇
邊隴上為荒蕪文皇愍斯民歷世受辜外謨蕃屏臣
內謀眾士夫爪牙應指授腹心獻一作良圖良圖協成

文大

一作乃

興百萬軍雷鼓震地起猛勢陵浮雲逋虜良
天誅面縛造壘門萬里同風教逆命稱妾臣光建五等
紀綱天人

天序

古芳樹行古今樂錄曰天序言聖皇應歷
受禪洪濟大化用人各盡其才也

天序歷應受禪承靈祐御羣龍勒螭虎弘濟大化英雋
作輔明明統萬機赫赫鎮四方谷繇稷契之疇協蘭芳
禮王臣覆兆民化之如天與地誰敢愛其身

大晉承運期

古上邪行古今樂錄曰大晉承運期言聖

皇應錄受圖化象神明也

大晉承運期德隆聖皇時清晏白日垂光應錄圖陟帝位繼天正玉衡化行象神明至哉道隆虞與唐元首敷洪化百察股肱竝忠良民大康隆隆赫赫福祚盈無疆

金靈運

古君馬黃行古今樂錄曰金靈運言聖皇踐祚致敬宗廟而孝道行於天下也

金靈運天符發聖徵見參日月惟我皇體神聖受魏禪應天命皇之興靈有徵登大麓御萬乘皇之輔若闕虎爪牙奮莫之禦皇之佐讚清化百事理萬邦賀神祇應嘉瑞章恭享禮薦先皇樂時奏磬管鏘鼓淵淵鍾噲噲

奠樽俎寶玉觴神歆饗咸悅康宴孫子祐無疆大孝烝烝德教被萬方

於穆我皇

古雉子行古今樂錄曰於穆我皇言聖皇受命德合神明也

於穆我皇盛德聖且明受禪君世光濟羣生普天率土莫不來庭顒顒六合內望風仰泰清萬國雍雍興頌聲大化洽地平而天成七政齊玉衡惟平峨峨佐命濟濟羣英夙夜乾乾萬機是經難治興匪荒寧謙道光冲不盈天地合德日月同榮赫赫煌煌耀幽冥三光克從於顯天垂景星龍鳳臻甘露宵零肅神祇祇上靈萬物欣

戴自天効其成

仲春振旅

古聖人出行古今樂錄曰仲春振旅言大晉申文武之教畋獵以時也

仲春振旅大致民武教於時日新師執提工執鼓坐作從節有序盛矣允文允武蒐田表禡甲法誓遂圍禁獻社祭允以時明國制文武並用禮之經列車如戰大教明古今誰能去兵大晉繼天濟羣生

夏苗田

古臨高臺行古今樂錄曰夏苗田言大晉畋狩順時爲苗除害也

夏苗田運將徂軍國異容文武殊乃命羣吏換車徒辨其號名讚契書王軍啓八門行同上帝居時路建大麾雲旗翳紫虛百官象其事疾則疾徐則徐回衡旋軫罷陳弊車獻禽享祠烝烝祀有虞惟大晉德參兩儀化雲敷

仲秋獮田

古遠期行古今樂錄曰仲秋獮田言大晉雖有文德不廢武事順時以殺伐也

仲秋獮田金德常剛涼風清且厲凝露結爲霜白臧司辰蒼隼時鷹揚鷹揚猶尙父順天以殺伐春秋時叙雷霆挺一作振威曜進退由鉦鼓致禽祀祊羽毛之用充軍府赫赫大晉德芬烈陵三五敷化以文雖治不廢武光

宅四海永享天之祐

順天道

古石留行古今樂錄曰順天道言仲冬大閱用武修文大晉之德配天也

順天道握神契三時示講武事冬大閱鳴鐃振鼓鐸旌旗象虹霓文制其中武不窮武動軍警眾禮成而義舉三驅以崇仁進止不失其序兵卒練將如闕虎惟闕虎氣陵青雲解圍三面殺不殄羣偃旌麾班六軍獻享烝修典文嘉大晉德配天祿報功爵侯賢饗燕樂受茲百祿嘉萬年

唐堯

古務成行古今樂錄曰唐堯言聖皇陟帝位德化光四表也

唐堯諮務成謙謙德所興積漸終光大履霜致堅冰神明道自然河海猶可凝舜禹統百揆元凱以次升禪讓應天曆睿聖世相承我皇陟帝位平衡正準繩德化飛四表祥氣見其徵興王坐俟旦一作恬一作自矜致遠由近始覆簣成山陵披圖按先籍有其證靈液

玄雲

古玄雲行古今樂錄曰玄雲言聖皇用人各盡其材也

玄雲起丘山祥氣萬里會龍飛何婉婉鳳翔何翩翩管

在唐虞朝時見青雲際今親遊萬方一作國流光溢天外
鶴鳴在後園清音隨風邁成湯隆顯命伊摯來如飛周
文獵渭濱遂載呂望歸符合如影響先天天弗違輟耕
綜時綱解褐衿天維元功配二王芬馨世所稀我皇叙
羣才洪烈何巍巍栢栢征四表濟濟理萬機神化感無
方髦才盈帝畿不顯惟昧且日新孔所咨茂哉明聖一作
人德日月同光輝

伯益

古黃爵行古今樂錄曰伯益言赤鳥銜書
有周以興今聖皇受命神雀來也

伯益佐舜禹職掌山與川德侔十六相息心入無間智

理周萬物下知衆鳥言黃雀應清化翔集何翩翩和鳴
棲庭樹徘徊雲日間夏桀爲無道密網施山河酷祝振
織網當奈黃雀何殷湯崇天德去其三面羅逍遙羣飛
來鳴聲乃復和朱雀作南宿鳳凰統羽羣赤鳥銜書至
天命瑞周文神雀今來遊爲我受命君嘉祥致天和膏
澤降青雲蘭風發芳氣闔世同其芬

釣竿

古釣竿行古今樂錄曰釣竿言聖皇德配
堯舜又有呂望之佐以濟天功致太平也
釣竿何冉冉甘餌芳且鮮臨川運息心微綸沉九淵太
公寶此術乃在靈祕篇機變隨物移精妙貫未然游魚

驚著鈞潛龍飛戾天戾天安所至撫翼翔太清太清一
何異兩儀出渾成玉衡正三辰造化賦羣形退願輔聖
君與神合其靈我君弘遠略天人不足并天人初并時
昧昧何芒芒日月有徵兆文象興二皇蚩尤亂生民黃
帝用兵征萬方逮夏禹而德衰三代不及虞與唐我皇
聖德配堯舜受禪卽祚享天祥率土蒙祐靡不肅庶事
康庶事康穆穆明明荷百祿保無極永泰平

晉凱歌二首

張華

命將出征歌

重華隆帝道戎蠻或不賓徐夷興有周鬼方亦違殷今
在盛明世寇虐動四垠豺狼染牙爪羣生號穹旻元帥
統方夏出車撫涼秦衆貞必以律臧否實在人威信加
殊類疎逃息自親單醪豈有味挾纊感至仁武功尚止
戈七德美安民遠跡由斯舉永世無風塵

勞還師歌

猷猷背天德構亂擾邦畿戎車震朔野羣帥贊皇威將
士齊心膂感義忘其私積勢如鞞弩赴節如發機囂聲
動山谷金光耀素暉揮戟陵勁敵武步蹈橫屍鯨鯢皆
授首北土永清夷管任冒隆暑今來白雪霏征夫信勤
瘁自古詠采薇收榮於合爵燕喜在凱歸

宋鼓吹鏡歌三首

宋書樂志曰鼓吹鏡歌四篇今唯有上邪

等三篇其一篇闕古今樂錄曰上邪曲四
解晚芝曲九解漢曲有遠期疑是也艾如
張三解沈約云樂人以音聲相傳訓詁不
可復解凡古樂錄皆大字是辭細字是聲
聲辭合寫故致然爾

上邪曲

大竭夜烏自云何來堂吾來聲烏奚姑悟姑尊盧聖子
黃尊來饑濟嬰烏白日為隨來郭吾微令吾

應龍夜烏由道何來直子為烏奚如悟姑尊盧雞子聽
烏虎行為來明吾微令吾

詩則夜烏道祿何來黑洛道烏奚悟如尊爾尊盧起黃

華烏伯遼為國日忠雨令吾

伯遼夜烏若國何來日忠雨烏奚如悟姑尊盧面道康
尊錄一作錄龍永烏赫赫福祚夜音微令吾

右四解

晚芝曲

幾令吾幾令諸韓亂發正令吾

幾令吾諸韓從聽心令吾若里洛何來韓微令吾

尊盧忌盧文盧子路子路為路雞如文盧炯烏諸祚微
令吾

幾令諸韓或公隨令吾

幾令吾幾諸或言隨令吾黑洛何來諸韓微令吾

尊盧安成隨來免路路子為吾路奚如文盧炯烏諸祚
微令吾

幾令吾幾諸或言隨令吾

幾令吾諸或言幾苦黑洛何來諸韓微令吾

尊盧公泂隨來免路子路子為路奚姑文盧炯烏諸

祚微令吾

右九解

艾如張曲

幾令吾呼曆舍居執來隨咄武子邪令烏銜針相風其
右其右

幾令吾呼羣議破葫執來隨吾咄武子邪令烏今烏今

臚入海相風及後

幾令吾呼無公赫吾執來隨吾咄武子邪令烏無公赫
吾媼立諸布始布

右三解

宋鼓吹鏡歌

何承天

宋書樂志曰鼓吹鏡歌十五篇何承天晉

義熙末私造一曰朱路二曰息悲公三曰

雍離四曰戰城南五曰巫山高六曰上陵

者七曰將進酒八曰君馬九曰芳樹十曰

有所息十一曰雉子遊原澤十二曰上邪

十三曰臨高臺十四曰遠期十五曰石流

樂府十九卷十二
按此諸曲皆承天私作疑未嘗被於歌也
雖有漢曲舊名大抵別增新意故其義與

古辭考之多不合云

悲公一作裴公

朱路篇

朱路揚和鸞翠蓋耀金華玄牡飾旒纓流旌拂飛霞雄
戟闢曠塗班劍翼高車三軍且莫喧聽我奏饒歌清鞞
驚短簫朗鼓節鳴笳人心惟愷豫茲音亮且和輕風起
紅塵淳瀾發微波逸韻騰天路積響結城阿仁聲被八
表威震振九遐嗟嗟介胄士勗哉念皇家

思悲公篇

思悲公懷袞衣東國何悲公西歸公西歸流二叔幼主

既悟偃禾復偃禾復聖志申營都新邑從斯民從斯民
德惟明制禮作樂興頌聲興頌聲致嘉祥鳴鳳爰集萬
國康萬國康猶弗已握髮吐食下羣士惟我君繼伊周
親覩盛世復何求

雍離篇

雍士多離心荆民懷怨情二凶不量德構難稱其兵王
人銜朝命正辭糾不庭上宰宣九伐萬里舉長旌樓船
掩江濱駟介飛重英歸德戒後夫賈勇尚先鳴逆徒既
不濟愚智亦相傾霜降未及染鄴郢忽已清西川無潛
鱗北渚有奔鯨凌威致天府一戰夷三城江漢被美化
宇宙歌太平惟我東郡民曾是深推誠

戰城南篇

戰城南衝黃塵丹旌電燄鼓雷震勅敵猛戎馬殷橫陣
巨野若屯雲仗大順應三靈義之所感士忘生長劔擊
繁勃鳴飛鏑炫晃亂奔星虎騎躍華眊旋朱火延起騰
飛烟驍雄斬高旗舉長角浮叫響清天夷羣寇殪逆徒
餘黎霑惠詠來蘇奏愷樂歸皇都班爵獻俘邦國娛

巫山高篇

巫山高三峽峻青壁千尋深谷萬仞崇巖冠靈林冥冥
山禽夜響晨猿相和鳴洪波迅復載逝載停悽悽商旅
之客懷苦情在谷陽九皇綱微李氏竊命宣武耀靈威
蠢爾逆縱復踐亂機王旅薄伐傳昔來至京師古之爲

國惟德是貴力戰而虐民鮮不顛墜矧乃叛戾伊胡能
遂咨爾巴子無放肆

上陵者篇

上陵者相追攀被服織麗振綺紈攜童幼升崇巒南望
城闕鬱盤桓王公第通衢端高甍萃屋列朱軒臨濟谷
掇秋蘭士女悠奕映隰原指營丘感牛山爽鳩旣没景
君歎嗟歲聿逝不還志氣衰沮玄鬢斑野莽宿墳土乾
顧此纍纍中心酸生必死亦何怨取樂今日展情懽

將進酒篇

將進酒慶三朝備繁禮慶嘉肴榮枯換霜霧交緩春帶
命朋僚車等旗馬齊鑣懷溫克樂林濠士失志慍情勞

樂府十九卷十四
思旨酒寄遊遨敗德人甘醇醪耽長夜或淫妖興屢舞
厲哇謠形傴僂聲號呶昔既濡志亦荒性命天國家亾
嗟後生節酣觴匪酒辜孰爲殃

君馬篇

君馬麗且閑揚鑣騰逸姿駿足躡流景高步追輕飛冉
冉六轡柔奕奕金華暉輕霄翼羽蓋長風靡淑旂願爲
范氏驅雍容步中畿豈効詭遇子馳騁趣危機鈞陵策
良駟造父爲之悲不怨吳坂峻但恨伯樂稀赦彼岐山
盜實濟韓原師奈何漢魏王縱情營所私疲民甘藜藿
廐馬患盈肥人畜賀厥養蒼生將焉歸

芳樹篇

芳樹生北庭豐隆正徘徊翠穎陵冬秀紅葩迎春開佳
人閑幽室惠心婉以諧蘭房掩綺幌綠草被長階日夕
遊雲際歸禽命同棲皓月盈素景涼風拂中閨哀絃理
虛堂要妙清且悽嘯歌流激楚傷此碩人懷梁塵集丹
帷微颺揚羅袿豈怨嘉時暮徒愴良願乖

有所思篇

有所思思咎人曾閱二子善養親和顏色奉昏晨至誠
烝烝通明神鄒孟軻爲齊卿稱身受祿不貪榮道不用
獨擁楹三徙旣許禮義明飛鳥集猛獸附功成事畢乃
更娶哀我生遘凶旻幼懼荼酷備艱辛慈顏絕見無因
長懷永思託丘墳

雉子遊原澤篇

雉子遊原澤，幼懷耿介心。飲啄雖勤苦，不願棲園林。古
有避世士，抗志清霄岑。浩然寄卜肆，揮棹通川陰。逍遙
風塵外，散髮撫鳴琴。卿相非所盼，何況於千金。功名豈
不美，寵辱亦相尋。冰炭結六府，憂虞纏胸襟。當世須大
度量，已不克任三復泉。流誠自驚良，已深

上邪篇

上邪下難正，衆枉不可矯。音和響必清，端影緣直表。大
化揚仁風，齊人猶偃草。聖王旣已沒，誰能弘至道。開春
湛柔露，代終肅嚴霜。承平貴孔孟，政弊侯申商。孝公明
賞罰，六世猶克昌。李斯肆濫刑，秦民所以亾。漢宣隆中

興魏祖，寧三方。譬彼針與石，效疾而稱良。行葦非不厚，
悠悠何詎央。琴瑟時未調，改絃當更張。矧乃治天下，此
要安可忘

臨高臺篇

臨高臺，望天衢。飄然輕舉陵太虛，攜列子超帝鄉。雲衣
雨帶乘風翔，肅龍駕會瑤臺。清暉浮景溢，蓬萊濟四海。
濯洧盤佇立，雲岳結幽蘭。馳迅風遊炎州，願言桑梓思。
舊遊傾霄蓋，靡電旌降彼天塗。積窳冥辭仙族，歸人羣。
懷忠抱義奉明君，任寤遠隨所遭。何爲遠想令心勞

遠期篇

遠期千里客，肅駕候良辰。近命城郭友，具爾惟懿親。高

門啓雙闈長筵列嘉賓中唐舞六佾三廂羅樂人簫管
激悲音羽毛揚華文金石響高宇絃歌動梁塵脩標多
巧捷九劔亦入神遷善自雅調成化由清均主人垂隆
慶羣士樂亾身願我聖明君邇期保萬春


石流篇


石上流水湔湔其波發源幽岫永歸長河瞻彼逝者歲
月其借子在川上惟以增懷嗟我殷憂載勞寤寐邁此
百懼有志不遂行年倏忽長勤是嬰永言沒世悼茲無
成幸遇開泰沐浴嘉運緩帶安寢亦又何愠古之爲仁
自求諸已虛情遙慕終於徒已

樂府詩集卷第十九

終

東吳毛晉訂正





門啓雙關長... 激悲音羽... 巧捷九劍... 慶翠士... 石上流水... 月其... 百... 有... 自... 永... 詩... 集... 卷... 十九... 州... 樂... 人... 勤... 聖... 清... 勿... 至... 入... 金... 何... 地... 古... 之... 爲... 不... 正...

